

四庫全書

經部

欽定四庫全書

經部  
讀禮通考卷九十三

詳校官監察御史<sub>臣</sub>劉湄

給事中<sub>臣</sub>溫常綬覆勘

總校官編修<sub>臣</sub>王燕緒

校對官編修<sub>臣</sub>汪鏞

謄錄監生<sub>臣</sub>翟灝

欽定四庫全書

讀禮通考卷九十三

刑部尚書徐乾學撰

葬考十二

山陵六

明熙祖祖陵

明會典熙祖曰祖陵在泗州設祠祭署置奉祠一員

陵戶二百九十三戶供灑掃

今言熙祖祖陵在泗州基運山奉祀朱氏宗人壻也

德祖懿祖就祖陵而望祭焉

國朝典彙基運山設陵戶三百十四家

明一統志祖陵在泗州城北一十三里

太常紀祖陵葬泗州蠙城之北洪武初設泗州祠祭署建文初改為泗蠙署永樂後仍舊嘉靖中封其山為基運

仁祖皇陵

明會典仁祖曰皇陵在鳳陽府設皇陵衛并祠祭署

奉祀一負祀丞三負陵戶三千三百四十二戶供直宿灑埽弘治元年勅內官一負監護

今言仁祖英陵改皇陵在中都翊聖山奉祀二人劉氏汪氏祀丞二人汪氏趙氏劉即義惠侯

鴻猷錄至正甲申疫癘大作仁祖陳太后俱不祿鄰人劉繼祖與地葬之高皇帝御製集有追贈劉繼祖為義惠侯語歸其獻地之功參之天潢玉牒大明實錄謨烈輯遺憲章錄吾學編諸書皆同今劉氏孫世

列太常見職祀典經九代矣

在田錄皇祖死時衣不被體棺槨無具及至葬浮土三尺而已上既即位欲遷葬下羣臣議咸曰擇陵改葬固陛下孝心之無已但今既葬而復遷之不惟有洩元氣且使神靈不安為今之計莫若增土如山栽植成林如是則元氣厚藏陰靈亦妥誠萬萬世無窮之美矣上竟從之

國朝典彙洪武二年二月詔立皇陵碑加仁祖淳皇

帝陵名曰英陵山名翊聖山四月更英陵曰皇陵立  
衛守之三年上追念仁祖太后始葬時禮有未備議  
欲改葬有言改葬恐泄山川靈氣乃不復啟葬但增  
土以培其封陵旁居民汪文劉英於上有舊召至慰  
撫之遂令招致鄰黨二十家以守陵墓命有司復其  
家十一年四月重建皇陵碑親製碑文命江陰侯吳  
良督工刻之

餘冬序錄洪武二年禮部尚書崔亮請定仁祖陵號

又請下太常行祭告禮太常博士孫吾與以為山陵之制莫備於漢漢文帝起霸陵時文帝尚在尊位豈有陵號祭告之禮又唐太宗昭陵之號定於葬長孫皇后時武后合葬乾陵其號定於高宗初葬之日其時帝后之陵初未有兩號其於祭告之禮決無有也蓋廟號與陵號不同廟號是易大行之號不祭告不可若陵之有號則後之嗣王所以識別先陵而已故歷代皆不以告亮曰創業之君尊其祖考則亦尊崇



其陵既尊其陵亦必以告禮緣人情加先帝陵號而不以告先帝非人情也於是廷議皆是亮遂命俟陵碑石成遣太常行祭告禮

明一統志皇陵在中都城西南十二里太平鄉

### 太祖孝陵

吾學編洪武三十一年閏五月乙酉帝崩于西宮葬孝陵

國朝典彙洪武三十一年閏五月葬高皇帝于孝陵

四十妃嬪祔馬東為懿文太子陵

乾學謹案明代諸載紀皆言太祖崩七日而葬惟吳朴龍飛紀畧踰七月而葬建文守禮之主不應葬太祖若是之速吳氏所紀是也嘉靖祀典孝陵葬太祖開天行道肇紀立極大聖至神仁文義武俊德成功高皇帝孝慈貞化哲順仁徽成天育聖至德高皇后

太常紀高皇帝高皇后葬南京鍾山號孝陵四十妃

嬪皆祔建文中置鍾山祠祭署及司園所永樂靖難  
後改設孝陵衛并神宮監改鍾山為孝陵祠祭署置  
署官嘉靖中封其山為神烈

南京太常寺志孝陵祀太祖高皇帝高皇后馬氏左  
一位淑妃李氏生懿文太子秦愍王晉恭王左二位  
皇妃生楚王魯王代王郢王齊王蜀王谷王唐王伊  
王潭王左三位皇貴妃生湘獻王肅王韓王藩王左  
四位皇貴人生遼王左五位皇美人生寧王安王右

一位碩妃生成祖文皇帝

乾學案實錄及諸野史皆謂懿文太子秦晉  
二王及文皇帝為高皇后所生獨南太常志  
云碩妃生文皇帝興化李先生清曾入寢廟  
審視其位次各如志所云然則實錄其未足  
盡信與

江寧府志明太祖孝陵在鍾山之陽與馬皇后合葬  
懿文太子祔葬於左寶城明樓御橋孝陵殿廊臺墀

道戟門文武方門大殿門左右方門御河橋樞星門  
華表多同大內制有成祖御製碑沿山周圍繚垣四  
十五里王門西紅門後紅門東西黑門神宮監孝陵  
衛環之嘉靖十年更名鍾山為神烈山其祔葬功臣  
墓俱在鍾山後

乾學案明太祖孝陵典故以革除之事實錄  
會典並無紀載今現存者陵前大金門三道  
門內為神功聖德碑有碑亭左有神烈山碑

亭亭左有卧碑刻崇禎時禁約自神功聖德  
碑而北有大石橋一又北有石獸二十四四  
虎四獬豸四橐駝四象四獅四馬各二蹲二  
立相間又石望柱二刻雲氣又石人八四文  
臣四武臣並夾侍神路之旁又北為櫺星門  
三道又北有石橋五並五空橋北門五道東  
西二井神帛爐左右各一中為孝陵享殿殿  
九間殿北門三道繚以周垣又大石橋一五

空中為甬道拾級而登進明樓即寶城矣自  
大金門之西為王門又西為西紅門而櫺星  
門之東為吳王山有鍾山亭西有萊房橋橋  
西為前湖懿文太子東陵在享殿左垣外又  
有虎山在寶城西南迤邐而西北為後紅門  
陵之規制約畧如此明初置孝陵衛典守  
本朝特設陵戶守衛康熙二十三年  
鑾駕南巡親詣孝陵拜奠

特諭嚴禁樵牧春秋二祭有司虔潔舉行仍  
命立碑以垂永久猗歟盛哉

聖德無疆誠千古所罕觀矣

興宗東陵

太常紀懿文太子葬孝陵左

南京太常寺志東陵懿文太子寢廟也洪武二十五

年薨一歲九大祭一素祭祀文曰維年月日皇帝

御名

謹遣致祭于高祖考懿文皇太子曰時維某節追念



親親用增感悼謹遣人致祭伏惟歆鑒尚享

萬曆二十四年九月南京太常寺卿楊時喬少卿詹沂等上言孝陵之東有懿文陵舊稱東陵建文初有廟號追謚升祭太廟既經革除以主置陵園至今歲時祫祭遣神樂觀行禮近奉命南京都督官行禮禮儀備矣特朝廷典禮自山陵至於藩封墳塋享堂其高深廣濶畝間皆有定數又皆用紅丹塗飾今東陵殿淺隘卑狹僅能展安祭器品物又以黑飾與衆庶

同非制也乞下部臣詳考禮制將堂宇改建庶於禮  
為稱 三十八年八月南京太常寺少卿劉曰梧上  
言自京城東出朝陽門三里鍾山竦峙孝陵在焉一  
歲三大祭五素祭東去數百武為東陵則懿文太子  
寢廟也一歲凡九大祭一素祭夫高皇帝自有常祭  
故禮不欲數乃懿文太子之祭獨視諸陵有加禮其  
中自有深意焉臣伏思之懿文太子舊有興宗孝康  
皇帝之號而今猶存故太子之稱高皇帝當享祀之

日寧不左盼東陵而念懿文太子之或怨恫否臣請  
仍還懿文太子已崇之尊號則高皇帝在天之靈以  
慰矣

### 建文帝

吾學編建文四年六月乙丑成祖至金川門大內火  
帝遜位壬申葬建文皇帝

成祖至金川門遂入城須臾宮中火起傳言帝崩成  
祖為發喪治葬或曰帝發火宮中即削髮為僧入蜀

或曰去蜀未幾入滇南常往來廣西貴州諸寺中天  
順中出滇南入京師居大內以壽終葬西山不封不  
樹

南京太常寺志萬歷二十四年九月南京太常寺卿  
楊時喬少卿詹沂等上言建文帝臨蒞天下五年其  
所為政載在國史生有爵則沒宜有謚號以遜位言  
則可比於高皇帝之追謚元順帝以親親言則可比  
於憲皇帝之追謚景皇帝且永樂初文皇帝詔喪葬

如儀遣官致祭蓋嘗葬祭以天子之禮今宜立之園陵以成先德無令天下後世有遺議焉又若行招魂之典立國厲之壇國家嘗以之待衆庶而於此何獨不然臣請於孝陵之左東陵之前建一享廟名以陵殿設主致祭以其同難后妃配食并以諸子晚出高牆者尋其葬所而表識之無令與孤魂等此皆可以義起而實天理人心所共以為當然者近經臺省諸臣請復建文年號禮部覆議欽諭附載高皇帝帝紀

之末仍存其年號今加以廟謚則禮制咸備天下後  
世誦法且不朽矣 三十八年八月南京太常寺少卿  
劉曰梧上言夫建文君非他高皇帝之嫡孫而懿文  
太子之嫡子也洪武二十五年懿文太子薨奉冊立  
為皇太孫三十一年高皇帝升遐挈神器而授之君  
臨天下者五年寬仁恭讓無大失德第以文柔不斷  
更張無序取怨宗親文皇帝遵祖訓稱兵靖內而建  
文君遂遜位焉家庭禪受非有易姓之嫌也鍾簾不

移非有社屋之慟也傳聞金川失守建文君闔宮自  
焚文皇帝出其遺骸於煨燼中哭之曰孺子何至於  
此旋用侍講王景言葬以天子之禮乃當時持祿保  
位之徒患得患失一意逢迎不復議及祔祀謚號山  
陵等禮遂使千古名義沈淪堙鬱垂二百年大為一  
代闕典此非文皇帝之過也夫生為君主歿無謚號  
既不得入祔太廟又不得別享專祀封樹莫識魂魄  
無依此忠臣義士所飲泣而田夫野老之所吞聲者

也臣嘗閱別錄載文皇帝入宮時建文君幼子牽帝衣而泣曰兒子餓死了帝亦泣曰爾在皇家豈有餓死之理命宮人哺之夫文皇帝不忍於建文君之幼子則不忍於建文君之無祀可知也且建文君每戒諸將曰毋輕犯皇叔使後世有不韙之名其尊尊親親之心可想也昔建文死事諸臣文皇帝常稱之曰彼食其祿自盡其忠夫在臣為忠則於其所忠者可知矣我皇上登極之初推文皇帝憫忠至意首發明



詔凡死事諸臣皆得祀於其鄉又允言官議凡諸臣墳墓咸蒙修治苗裔咸蒙卹錄而於建文君獨否是有臣而可以無君也况廟堂之上諱言之野史則已繁言之矣失今不為釐正萬世而下必有正之者伏乞皇上體祖宗之情之所必至察倫常之所不得不然勅禮部集廷臣會議追崇建文君尊謚增立廟祀復其年號封表山陵用補一代闕典如以太廟難於議祔則請祔主於懿文太子之陵廟一體致祭則皇

上之達孝傳流於萬世矣

客座贅語建文帝壬午遜位至正統復出移入京師  
大內載於紀傳云云然西山不封不樹之說毫無髣髴  
髣使當時果有之於時禁網漸弛何所諱而人遂不  
一志其處且靖難師至日爬梳搜捕亡遺當時誰敢  
指他尸誑以為帝者紀又載葬帝以天子禮夫禮以  
天子陵寢今在何地既不為置陵守冢又何云以天  
子葬乎此兩說者姑以意逆之存疑焉可也

兩京求舊錄金川門之變建文帝合宮自焚實錄謂  
中使出其尸於火中越七日備禮葬之遣官致祭而  
不言葬地所在或謂松陽王景請葬以天子之禮成  
祖從之若葬以天子豈不為置陵守冢掌之祠官乎  
是則備禮云者特史臣欺世之辭爾至於北京金山  
口景皇帝陵北相傳有天下大師之墓好事者實之  
以為建文帝墳然訪之土人皆莫辨其處也遜國之  
事野史紛紜以思恩所獲僧楊應祥謚為楊應能或

又以太監吳誠訛為吳亮且隱應祥之斃獄而云老  
佛取入西內又言葬之西山不封不樹遂指不知何  
人之墓以為帝墳轉相紀述亡而為有母乃為有識  
者所笑乎又考應祥之獲在正統五年土官岑瑛執  
送總兵柳溥械至京師錮之錦衣衛獄是年太監吳  
誠坐征麓川失利弗救法司論辟雖得宥死未必即  
給事宮中所傳老佛語誠伏地餽賜鵝肉誠拜而哭  
其事亦不足信崇禎中鞏都尉永固請以建文帝入

祀典思陵曰建文無陵從何處祭於是言者謂當祔西山不封不樹之訛而考尋成祖禮葬之蹟是亦癡人說夢矣

成祖長陵

吾學編永樂二十二年秋七月辛卯帝崩于榆木川葬長陵

大政記永樂七年五月營壽陵于北京昌平縣東黃土山封曰天壽山命武義伯王通督工

宙載文皇帝初卜陵衆議欲用檀柘寺基上獨銳意用黃土山即天壽山也

水東日記寧陽人王賢少遇異人相之當官三品乃授以青囊書遂精其術永樂七年成祖卜壽陵有司以賢應命於昌平東北十八里選得吉壤舊名東榨子山陵成封曰天壽賢後累官至順天府尹

獻徵錄永樂七年仁孝皇后尚未葬成祖擇壽陵久未得吉壤禮部尚書趙玘以江西術士廖均卿至昌

平縣遍閱諸山得縣東黃土山成祖即日臨視封天  
壽山命武義伯王通董役授均卿官

朱彝尊曰天壽山陵擇地或云江西廖均卿或云山  
東王賢賢字惟善中永樂辛卯鄉試以鄆陵訓導擢  
戶科給事中陞光祿寺少卿尋遷順天府尹實錄暨  
宛州府志皆未言其精青烏之術所聞異辭難以縣  
也定

昌平山水記自昌平州西門而北六里至陵下有白  
石坊一座五架又北有石橋三空又二里至大紅門  
門三道東西二角門門外東西各有碑刻曰官負人

等至此下馬入門一里有碑亭重簷四出陞中有穹  
碑高三丈餘龍頭龜趺題曰大明長陵神功聖德碑  
仁宗皇帝御製文也亭外四隅有石柱四俱刻交龍  
環之其東有行宮又前可二里為櫺星門門三道俗  
名龍鳳門門之前有石人十二四勲臣四文臣四武  
臣石獸二十四四馬四麒麟四象四橐駝四獬豸四  
獅子各二立二蹲近者立遠者蹲石柱二刻雲氣並  
夾侍神路之旁迤邐而南以接乎碑亭碑文後書洪



熙元年四月十七日孝子嗣皇帝某謹述蓋文成而  
碑未立宣德十年四月辛酉修長陵獻陵始置石人  
石馬等於御道東西十月己酉建長陵神功聖德碑  
是時仁孝皇后之葬二十有三年文皇帝之葬亦十  
有一年然而始立者重民力也櫺星門北一里半為  
山坡坡西少南有舊行宮土垣一周坡北一里有石  
橋五空又北二百步有大石橋七空大石橋東北一  
里許有新行宮宮有感恩殿宮東南有工部廠及內

監公署大石橋正北二里有石橋五空又三里至長陵殿門神道自嘉靖十五年世宗謁陵始命以石甃自大紅門以內蒼松翠栢無慮數十萬株今盡矣

肅松錄出昌平州東門數里入伽藍口又三里為永陵園園後曰蔣山山腹有神仙洞洞不甚深鐫字於旁曰蜿蜒龍脊山吞月磊砢雲根洞有天上懸一石如覆鐘狀山上有三清殿復行二里度一溪溪西有七鳳橋長陵神道東流之水經焉旁有井故地名玉

井灣北有工部廠與龍王廟並廟碑三弘治嘉靖萬  
歷中太監王定張保山潘朝用所立廠碑二其一思  
陵命太監魏國徵掌昌宣軍務勅諭其一翰林韓四  
維所為記也定與保山朝用皆為工部廠負命掌鎮  
兵則自國徵始繼之者王希忠申之秀也希忠後死  
亂軍中之秀見賊陷京城削髮去為僧有司香太監  
貫宗云然又行里許為德陵神宮監又半里許名東  
井相傳成祖八妃葬此少北渡一小石橋為德陵陵

西向面大溪過大石橋而西至永陵再西而北至景陵由長陵西下坡渡石橋為獻陵又度小石橋為慶陵再度石橋二為裕陵松左右成列再西見碑樓出松林中度一大石橋抵碑樓下則茂陵也松列樓外者存二十二株列樓以內至祔恩門者三十六株自祔恩門入難以數計矣由茂陵神馬廐神宮監而西三四里度一大石橋至泰陵渡溪而南至康陵折而北為錐石口自溪而東有斷橋循麓右轉復渡溪水

上一岡至定陵少南為西井再南為萬妃墳又南則昭陵東至思陵

燕都游覽志天壽山陵前有鳳凰山後有黃花鎮左有蟒山右有虎峪東西山口兩水會流於朝宗河文皇帝葬所曰康家莊是為長陵次皇山距長陵一里有半是為獻陵次黑山距獻陵三里是為景陵次石門山距景陵六里是為裕陵次寶山距裕陵二里是為茂陵次史家山距茂陵二里是為泰陵次金嶺山

距泰陵三里是為康陵次陽翠嶺距康陵十六里是為永陵次大峪山距永陵九里是為昭陵次亦名大峪山距昭陵一里是為定陵次皇山二嶺距定陵五里是為慶陵

肅松錄德陵葬雙鎖山潭子峪在永陵東北思陵葬錦屏山小紅門內

燕都游覽志皇陵入路第一層龍沙帶崖第二層白玉石坊在紅門之南嘉靖十九年建坊北石橋橋南

二喬松北瞰流泉松栢左右列各六行第三層自坊  
內行松陰中三里許至紅門下馬步入門內左為拂  
塵殿圍牆正殿二層羣室六十餘楹皇帝謁陵至此  
更衣左右槐樹正寢二殿羣圍房各五百餘間第四  
層至龍鳳門黃綠琉璃甃治門內外白玉石華表柱  
各二雕蟠龍色如乾黃玉門內外石橋七座白玉石  
為闌第五層至碑樓洪熙元年建碑高十許丈無字  
第六層至櫺星門門左右列雕龍白玉石柱石人石

馬麒麟象虎駱駝犀牛獅子

菊隱紀聞明初有玉鶻十二從南方來飛集燕山識者謂北平當王蓋兆燕山十二陵也

世廟識餘錄天壽山名始於成祖蓋嘗駐蹕於此飲酒是日適萬壽之期羣臣上壽故名天壽今之傳訛者謂為御體所藏名天壽者非也

小草齋集入紅門有殿曰時陟車駕更衣之所也神路中石獅子犀象駱駝麒麟馬各四石人十二擎天柱



四望柱二碑亭一而九陵分道焉長陵當中正南鄉  
其左為永陵景陵右為茂陵裕陵獻陵昭陵惟康定  
泰三陵稍遠可三十里

實錄宣德十年四月修葺長陵獻陵始置石人石馬  
於御道東西

景泰元年正月命於天壽山之南築城周圍十二里  
以居長陵景陵獻陵三衛官軍二年十月徙昌平縣  
治并儒學倉庫於新築土城之內

燕都游覽志長陵在龍鳳門正北十二里居中其地  
名山塲乃康家莊也陵之左有元時康家墳存之春  
秋賜二祭陵規制大於諸陵祔恩殿石欄三重惟此  
與定陵為然其餘僅一重耳登寶城獨從中道一門  
入與他陵左右掖門入者異碑闊四尺五寸厚二尺  
五寸他陵亦不及也

昌平山水記長陵在天壽山中峯之下門三道東西  
二角門門內東神厨五間西神庫五間厨前有碑亭

一座南向內有碑龍頭龜趺無字重門三道榜曰稜  
恩門東西二小角門門內有神帛爐東西各一其上  
為享殿榜曰稜恩殿九間重簷中四柱飾以金蓮餘  
皆髹漆階三道中一道為神路中平外城其平刺為  
龍形東西二道皆城有白石欄三層東西皆有級執事  
所上也兩廡各十五間殿後為門三道又進為白石  
坊一座又進為石臺其上爐一花瓶燭臺各二皆白  
石又前為寶城城下有甬道內為黃琉璃屏一座旁

有級分東西上折而南是為明樓重簷四出陞前俯  
享殿後接寶城上有榜曰長陵中有大碑一上書曰  
大明用篆下書曰成祖文皇帝之陵用楷字大徑尺  
以金填之碑用朱漆欄畫雲氣碑頭交龍方趺寶城  
周圍二里城之內下有水溝自殿門左右繚以周垣  
屬之寶城舊有樹長陵門右別有具服殿五間東  
向有周垣垣南有白石槽五方而長名曰雀池貯水  
以飲雀

嘉靖祀典長陵葬成祖體天弘道高明廣運聖武神  
功純仁至孝文皇帝仁孝慈懿誠明莊獻配天齊聖  
文皇后徐氏外一十六妃謚葬不可考

名山藏仁孝徐皇后中山王達長女后觀女憲女誠  
諸家約其要義作內訓二十篇復采儒道釋嘉言善  
行類編勸善書示皇太子諸王永樂五年七月崩

宣宗實錄宣德五年三月上駐蹕陵下謂侍臣曰皇  
祖考常言古帝王陵寢有崇奢麗及藏寶玉者皆無

遠慮吾子孫宜戒之不可蹈也今所建陵寢皆皇祖當時規畫不敢有所增益

實錄宣德十年十月己酉建長陵神功聖德碑長陵碑正統初南城程南雲奉命書

國朝典彙嘉靖十七年上閱長陵碑欲更成祖謚號命鋟木加碑上郭勛上疏以為宜盡磨舊字更書之可以垂永久上不悅曰朕不忍琢傷舊號下禮部翰林院議部覆請遵上諭如式刊製擇吉奉安詔可

野獲編萬歷三十二年雷震長陵碑上命重建於是  
大學士沈一貫上疏言世祖欲改刻成祖陵碑而未  
遑今雷神奮威乃天意示更新之象欲皇上續成祖  
德乘此更立新碑此莫大之慶也上優旨允行噫上  
蒼示警於祖陵正宜君臣修省乃反以為瑞應形之  
章奏比王安石天變不足畏罪浮十倍矣

仁宗獻陵

吾學編洪熙元年五月辛巳帝崩于欽安殿九月葬

獻陵

燕都游覽志仁宗昭皇帝陵曰獻陵在長陵之右

昌平山水記獻陵在天壽山西峯之下距長陵西少北一里自北五空橋北三十餘步分西為獻陵神路至殿門可二里有碑亭一座重簷四出陞內有碑龍頭龜趺無字亭南有小橋門三道榜曰袞恩門無角門殿五間單簷柱皆朱漆直椽階三道其平刺為雲花石欄一層東西有級兩廡各五間餘如長陵殿有



後門為短簷屬之垣垣有門垣後有土山曰玉案山  
故闢神路於殿西玉案山之右有小橋前數步又一  
小橋跨溝水溝水自陵東來過橋下會於北五空橋  
山後橋三道皆一空又進為門三道並如長陵而高  
廣殺之甬道平寶城小冢半填塋曰獻陵碑曰大明  
仁宗昭皇帝之陵餘並如長陵之前門及殿山之  
後門及寶城各為一周垣舊有樹

嘉靖祀典獻陵葬仁宗敬天體道純誠至德弘文欽

武章聖達孝昭皇帝誠孝恭肅明德弘仁順天啓聖  
昭皇后張氏其恭靖賢妃恭懿惠妃貞靜敬妃俱葬  
金山外一妃謚葬不可考

國朝典彙七妃三葬金山餘皆從葬

名山藏誠孝章皇后永城人彭城伯張麒女正統七  
年崩

昌平山水記十二陵制獻陵最樸景陵次之洪熙元  
年五月上疾大漸遺詔有曰朕臨御日淺恩澤未浹

於民不忍重勞山陵制度務從儉約是日上崩皇太子即皇帝位及營仁宗皇帝山陵上諭尚書蹇義夏原吉等曰國家以四海之富葬其親豈惜勞費然古之帝王皆從儉制孝子思保其親之體魄於久遠者亦不欲厚葬秦漢之事足為明鑑況皇考遺詔天下所共知今建山陵宜遵先志義等對曰聖見高遠發於孝思誠萬世之利於是命成山侯王通工部尚書黃福總其事其制度皆上所規畫也

宣宗景陵

吾學編宣德十年春正月甲戌帝崩于乾清宮六月葬景陵

燕都游覽志宣宗章皇帝陵曰景陵在長陵之左  
昌平山水記景陵在天壽山東峯之下距長陵東少  
北一里半自北五空橋南數步分東為景陵神路至  
殿門三里碑亭門廡如獻陵殿五間重簷階三道其平  
刻為龍形殿有後門不屬垣殿後門三道並如獻陵

甬道平寶城長而狹榜曰景陵碑曰大明宣宗章皇  
帝之陵周垣如長陵寶城前存樹十五株冢上一株  
嘉靖祀典景陵葬宣宗憲天崇道英明神聖欽文昭  
武寬仁純孝章皇帝孝恭懿憲慈仁莊烈齊天配聖  
章皇后孫氏而以恭讓誠順康穆靜慈皇后胡氏葬  
金山榮思賢妃亦葬金山外六妃謚葬不可考

國朝典彙八妃一葬金山餘皆從葬

名山藏孝恭孫皇后鄒平人父忠永城主簿天順六

年崩合葬景陵

恭讓胡皇后濟寧人父榮錦衣百戶正統八年殂

世宗實錄嘉靖十五年四月上親詣景陵語郭勛等  
曰景陵規制獨小又多損壞其於宣宗皇帝功德之  
大殊為勿稱當重建享殿增崇基構

今言天壽七陵惟景陵規制獨小嘉靖十五年稍廓  
大之

朱彛尊曰考實錄宣德十年三月庚子贈何氏為貴  
妃謚端靜趙氏為賢妃謚純靜吳氏為惠妃謚貞順

焦氏為淑妃諡莊靜曹氏為敬妃諡莊順徐氏為順妃諡貞惠袁氏為麗妃諡恭定諸氏為恭妃諡貞靖李氏為充妃諡恭順何氏為成妃諡肅僖諡冊有曰茲委身而蹈義隨龍馭以上賓宜薦徽稱用彰節行是從葬者蓋有十妃祀典與彙皆誤也

### 英宗裕陵

吾學編天順八年春正月庚午帝崩于乾清宮二月

### 葬裕陵

燕都游覽志英宗睿皇帝陵曰裕陵在慶陵少西

實錄天順八年六月裕陵成其制金井寶山城池一

座照壁一座明樓花門樓各一座俱三間香殿一座  
五間雲龍五彩貼金硃紅油石碑一祭臺石一燒紙  
爐二神厨正房五左右廂房六宰牲亭一牆門一奉  
祀房三門房三神路五百三十八丈七尺神宮監前  
堂五間穿堂三間後堂五間左右廂房四座二十間  
周圍歇房并厨房八十六間樓一門房一大小牆門  
二十五小房八井一神馬房馬房二十歇房九馬椿  
三十二大小牆門六白石橋三甌石橋二周圍包砌



河岸溝渠三百八十八丈二尺栽培松樹二千六百八十四株

昌平山水記裕陵在石門山距獻陵西三里自獻陵碑亭前分西為裕陵神路路有小石橋碑亭北有橋三道皆一空平刻雲花殿無後門榜曰裕陵碑曰大明英宗睿皇帝之陵餘並如景陵寶城如獻陵垣內及冢上樹存一百六七十株

嘉靖祀典裕陵葬英宗法天立道仁明誠敬昭文憲

武至德廣孝睿皇帝孝莊獻穆弘惠顯仁恭天欽聖  
睿皇后錢氏孝肅貞順康懿光烈輔天成聖皇后周  
氏其靖莊安穆宸妃莊僖端肅安妃端莊昭妃恭安  
和妃恭僖成妃榮靖貞妃恭靖莊妃恭莊端惠德妃  
莊和安靖順妃昭肅靖端賢妃端靖安榮淑妃安和  
榮靖麗妃昭靜恭妃僖恪充妃惠和麗妃端和懿妃  
俱葬金山貞順懿恭惠妃葬桃山

國朝典彙十八妃一葬繇山餘俱金山

名山藏孝莊錢皇后海州人父貴都指揮僉事正統七年冊立成化四年崩祔葬裕陵然異隧焉去英宗泉堂可數丈許中室之虛右墻以待孝肅周后則其中有隧道通而孝肅又不得預於配祭

孝肅周太后昌平人慶雲侯贈寧國公龍女弘治十七年三月崩

野獲編本朝山陵初止一后祔葬至英宗元配孝莊錢后崩時憲宗壓於生母孝肅周后幾不得祔葬裕

陵大臣力諍之始虛孝肅玄宮以待而二后並祔自此始矣

皇明通紀天順八年正月上疾大漸遺命勿以嬪御殉葬令太監牛玉執筆書之

否泰錄高廟文廟仁廟宣廟皆用人殉葬至英宗臨崩召憲廟謂之曰用人殉葬吾不忍也此事宜自我止後世子孫勿復為之至今遂為定制

景皇帝陵

吾學編景泰八年春正月帝不豫

天順元年二月廢景泰皇帝為郕王癸丑郕王薨于  
西宮

長安客話景皇帝陵在金山口距西山不十里陵前  
坎窞樹多白楊及樗凡諸王公主夭殤者並葬金山  
口其地與景皇陵相屬又諸妃亦多葬此

嘉靖祀典景皇帝陵葬恭仁康定景皇帝貞惠安和  
景皇后

實錄景泰七年三月謚皇后杭氏曰肅孝皇后

雙槐歲抄天順元年二月乙未朔廢景泰帝仍為郕王歸西內皇太后制諭也戊戌命郕王所立皇太后吳氏仍號宣廟賢妃皇后汪氏復為郕王妃懷獻太子見濟為懷獻世子肅孝皇后杭氏及貴妃唐氏俱革其名號癸丑郕王薨葬祭禮如親王謚曰戾唐氏等妃嬪俱賜紅帛自盡以殉葬

憲宗實錄成化十一年十二月戊子命復郕王帝號

勅廷臣曰曩者朕叔郕王踐阼戡難保邦奠安宗社  
亦既有年及寢疾臨薨之際姦臣貪功生事妄興讒  
搆請去帝號先帝尋知誣枉深懷悔恨以次抵姦於  
法不幸上賓未及舉正朕嗣承大業於茲一紀每思  
先儒有言祖父有欲為之志而未為子孫善繼其志  
而成就之此所謂孝間以帝號之復質諸聖母皇太  
后亦云此先帝本意宜即舉行朕祇服嗣訓敷念親  
親誕告在廷用成先志其郕王可仍舊皇帝之號所

有尊謚禮部會議以聞仍令所司修飾陵寢壬辰文  
武羣臣英國公張懋等議曰仰惟邸王早儋王爵奉  
藩京師當先帝北狩之秋勅敵南侵之日郊畿震動  
神器虛危乃承傳授之命於慈闈俯從擁戴之情於  
臣庶嗣登大位弘濟艱難拔擢賢才延覽羣策收既  
潰之士卒却深入之軍鋒保固京城奠安宗社申嚴  
戰守之師再遣奉迎之使卒致也先悔過先帝回鑾  
尊養之禮有加讒間之言罔入始終八載全獲兩宮



仁恩覃被於寰區威武奮揚於海宇奈屬末年寢疾  
遽罹臣下姦謀巧肆讒間於臨危請削帝號於既逝  
尚賴先王之覺悟旋抵姦宄於誅夷雖舉正之未遑  
實貽謀之有待皇帝明高日月量廓乾坤孝道丕隆  
承先帝所欲為之素志綸音渙布復景泰所已有之  
徽稱上慰在天之靈下協率土之議臣等謹擴聞見  
之蹟庸陳羣議之公宜上尊謚曰恭仁康定景皇帝  
已亥命翰林院撰謚冊遣撫寧侯朱永襄城侯李謹

定西侯蔣琬祭告天地宗廟社稷英國公張懋詣陵  
寢上尊謚冊曰維成化十一年歲次乙未十二月丙  
子朔越二十四日姪嗣皇帝謹再拜稽首上言伏以  
功業之盛宜享乎徽稱孝愛之隆莫先於繼志叔父  
邨王比當多難之秋俯徇羣臣之請臨朝踐阼奮武  
揚兵却敵勢於方張致鑾輿之遄復奠安宗社輯寧  
邦家敬養備於奉尊惠化周於逮下偶因寢疾遂至  
彌留皇考應天順人復正大位眷惟同氣初無間言

奈姦臣貪功妄生異議請去帝號退就王封賴皇考  
日月之明灼知誣枉抵姦於法擬復舊稱不幸上賓  
因而未果姪嗣守大業敦念親親間以帝號之復請  
於聖母伏承慈旨欣然允從是用參合至公祇薦鴻  
號昭叔父之盛烈副皇考之素心謹遣英國公張懋  
奉冊寶上尊謚曰恭仁康定景皇帝神靈如在鑒是  
用歆錫慶流芳永永無極謹告庚子太常寺奏景皇  
帝陵寢舊祭用少牢遣內官行禮今既上尊謚其祭

儀并遣官請如長獻諸陵從之

國史唯疑景帝追復謚號始荆門州訓導高瑤初為  
黎淳所駁辭甚厲訖如瑤請亦公論之不容泯也

帝京景物畧世宗謁陵畢過金山特謁景帝陵廟初  
碧瓦命以黃瓦易之

嘉靖祀典上諭尚書夏言景皇帝陵碑偏置門左非  
宜建亭於陵門之外大門之內庶稱尊崇於是言請  
作亭蓋覆報可

憲宗茂陵

吾學編成化二十三年八月戊子帝崩于乾清宮冬十月葬茂陵

燕都游覽志憲宗純皇帝陵曰茂陵在裕陵西北

昌平山水記茂陵在聚寶山距裕陵西一里自裕陵碑亭前分西為茂陵神路路有石橋一空制如裕陵榜曰茂陵碑曰大明憲宗純皇帝之陵垣内外及冢上樹千餘株十二陵唯茂陵獨完他陵或僅存御榻

茂陵則箕虞之屬猶有存者

嘉靖祀典茂陵葬憲宗繼天凝道誠明仁敬崇文肅  
武宏德聖孝純皇帝孝貞莊懿恭靖仁慈欽天輔聖  
純皇后王氏孝穆慈慧恭恪莊僖崇天承聖皇后紀  
氏孝惠康肅溫仁懿順協天佑聖皇后邵氏而恭肅  
端順榮靖皇貴妃亦葬天壽山端順賢妃恭惠和妃  
和惠靖妃莊靖順妃端榮賢妃莊懿德妃靖順惠妃  
昭順麗妃端僖安妃恭懿敬妃懷榮賢妃靖僖榮妃

俱葬金山

名山藏孝貞王皇后上元人中軍都督贈阜國公鎮之女正德十三年二月崩合葬茂陵

國朝典彙孝穆皇后紀氏孝宗生母也初葬金山孝宗即位遷合葬孝惠皇后邵氏興獻帝生母也初葬金山世宗即位遷合葬十四妃一葬陵之西南餘俱葬金山廢后吳氏亦葬金山

名山藏孝穆紀太后賀人本蠻土官女成化十一年

六月暴薨孝惠邵太后昌化人父林嘉靖元年崩  
野獲編憲宗初選吳氏旋廢則元配為孝貞后王氏  
而孝宗生母為孝穆后紀氏同祔茂陵蓋循用裕陵  
新例至嘉靖入續則憲宗貴妃邵氏已稱壽安皇太  
后尋崩初葬金山後亦遷祔茂陵於是三后並祔又  
從此始

孝宗泰陵

吾學編弘治十八年五月辛卯帝崩于乾清宮



燕都游覽志孝宗敬皇帝陵曰泰陵在茂陵之西  
昌平山水記泰陵在史家山距茂陵西少北二里自  
茂陵碑亭前分西為泰陵神路路有石橋五空賢莊  
灰嶺二水逕焉碑亭北有橋三道皆一空制如茂陵  
榜曰泰陵碑曰大明孝宗敬皇帝之陵垣內及冢上  
樹百餘株殿上存御座御案御榻各一承塵皆五色  
花板多殘缺而茂陵泰陵獨完

武宗實錄弘治十八年六月營泰陵於天壽山勅太

監李興新寧伯譚祐工部左侍郎李鏐提督發五軍等三營官軍萬人供役

九朝野記初建泰陵都下盛傳其地有水吏部主事楊子器直言其事時督工太監李興有殊寵勢焰薰灼遂下楊錦衣獄莫敢救者適起復知縣丘泰甫田人到京上疏言子器此奏甚有益蓋泰陵有水通國皆云使此時不言萬一梓宮葬後有言者欲開則洩氣不開則抱恨終天今視水有無此疑可釋尋遣司

禮監太監蕭敬押楊往衆謂必遭興毒手及至興率  
奴客詈罵楊欲箠之蕭敬曰水之有無視之立見何  
必爾又顧興曰士大夫可殺不可辱也遂得免既回  
奏無水衆又謂楊必死事傳禁中太皇太后聞之曰  
無水則已何必罪之遂得還職

無用閒談泰陵金井內水孔如巨杯水仰歆不止楊  
名父親見之歸而疏諸朝請易地事下工部湯陰李  
司空鎡怒其多言害成功陰令人塞其孔以誹謗狂

妄奏命錦衣官校押名父赴陵所驗看名父身親三  
木朝辭賦詩人共憐之孝廟聖體竟葬此中言之可  
為寒心

嘉靖祀典泰陵葬孝宗建天明道誠純中正聖文神  
武至仁大德敬皇帝孝康靖肅莊慈哲懿翊天贊聖  
敬皇后張氏

名山藏孝康張皇后興濟人父巒都督同知壽寧伯  
贈昌國公嘉靖二十一年八月崩

武宗康陵

吾學編正德十六年三月丙寅帝崩于豹房

燕都游覽志武宗毅皇帝陵曰康陵在泰陵正西田  
大受謁康陵記曰康陵西去紅門三十里十二陵中  
最僻遠者陵背負五峯形如青齒舊名蓮花山灌  
莽陰森望之不見土石長松大者至數十圍

昌平山水記康陵在金嶺山距泰陵西南二里自泰  
陵橋下分西南為康陵神路山勢自此折而南故康

陵東向路有石橋五空錐石口水逕焉又前有石橋  
三空制如泰陵榜曰康陵碑曰大明武宗毅皇帝之  
陵垣內外樹二三百株

嘉靖祀典康陵葬武宗承天達道英肅睿哲昭德顯  
功宏文思孝毅皇帝孝靜莊惠安肅溫誠順天偕聖  
毅皇后夏氏

國朝典彙二妃葬金山

名山藏孝靜夏皇后上元人父儒封慶陽伯嘉靖十

四年崩

世宗永陵

實錄嘉靖四十五年十二月庚子上崩于乾清宮隆慶元年二月癸卯葬永陵

燕都游覽志世宗肅皇帝陵曰永陵在長陵東南亭殿前後凡五重牆內外皆植栝子松棧恩殿後之左有松卧而復起西向三折而始上寶城頂有杏有桑昌平山水記永陵在十八道嶺嘉靖十五年改名陽

翠嶺距長陵東南三里自七空橋北百餘步分東為  
永陵神路長三里有石橋一空有碑亭一座如獻陵  
而崇鉅過之碑亭南有石橋三道皆一空門三道門  
內東神厨五間西神庫五間重門三道東西二小角  
門又進復有重門三道飾以石闌累級而上方至中  
墀殿七間兩廡各九間其平刺左龍右鳳石闌二層  
餘悉如長陵殿後有門兩旁有垣垣各有門明樓無  
甬道東西為白石門曲折而上樓之三面皆為城堞



榜曰永陵碑曰大明世宗肅皇帝之陵享殿明樓皆以文石為砌壯麗精緻長陵不及也寶城前東西垣各為一門門外為東西長街而設重垣於外垣凡二周皆屬之寶城其規制特大

北游紀方永陵成世宗登陽翠嶺顧謂工部臣曰朕陵如是止乎部臣倉惶對曰外尚有周垣未作乃築垣諸陵所無也後定陵效之

芹城小志永陵葬世宗欽天履道英毅聖神宣文廣

武洪仁大孝肅皇帝孝潔恭懿慈睿安莊相天翊聖  
肅皇后陳氏孝烈端順敏惠恭誠祇天衛聖皇后方  
氏孝恪淵純慈懿贊天開聖恭順皇后杜氏

名山藏孝潔陳皇后元城人父萬言都督同知封泰  
和伯嘉靖七年十月崩初謚悼靈皇后以其年別葬  
襖兒谷久之改謚孝潔穆宗即位遷葬永陵孝烈方  
皇后江陵人父都督銳封安平伯嘉靖二十六年宮  
中火后崩孝恪杜太后大興人慶都伯林女嘉靖三

十三年薨

今言嘉靖十五年作壽陵君即位為裨禮也壽宮在十八道嶺

國朝典彙孝潔皇后陳氏初葬襖兒谷隆慶初遷合葬繼后方氏葬金山孝恪皇后杜氏穆宗生母也初葬金山隆慶初遷合葬二十六嬪惟五妃葬襖兒峪餘俱金山

野獲編世宗元配為孝潔后陳氏繼曰孝烈后方氏

上以方氏有定變衛護功其崩也梓宮先入永陵玄  
宮又特祧仁宗以孝烈神主入太廟比穆宗登極遷  
孝潔梓宮與孝烈並祔而上生母為孝恪后杜氏亦  
遷祔焉永陵亦有三后同穴一如茂陵故事矣

嘉靖祀典嘉靖十五年禮部諸臣上言帝后合葬諸  
妃陪葬古今經常之制英宗皇帝遺詔皇妃他日宜  
合葬惠妃亦當遷來以後諸妃次第祔葬聖訓具在  
今會典止載睿皇后錢氏合葬裕陵諸妃竟無陪葬

者茂陵亦無陪葬莫考其故臣等竊以諸妃陪葬義則不當由隧宜於外垣之內寶山城之外明樓之前左右相向以次而祔庶合禮制從之

穆宗昭陵

實錄隆慶六年五月庚戌上崩于乾清宮九月壬寅葬昭陵

燕都將覽志穆宗莊皇帝陵曰昭陵在定陵之南東向

昌平山水記昭陵在大峪山距長陵西南四里自七  
空橋北二百許步分西為昭陵神路長四里路有石  
橋五空德勝口水逕焉又西有石橋一空陵東向碑  
亭西有橋三道皆一空餘如康陵榜曰昭陵碑曰大  
明穆宗莊皇帝之陵

芹城小志昭陵葬穆宗契天隆道淵懿寬仁顯文光  
武純德弘孝莊皇帝孝懿貞惠順哲恭仁儷天襄聖  
莊皇后李氏孝安貞懿恭純溫惠佐天弘聖皇后陳

氏孝定貞純欽仁端肅弼天祚聖皇后李氏

名山藏孝懿李皇后昌平人德平伯銘女以世宗三十七年薨於裕王邸孝安陳皇后大名人萬曆二十四年崩

神宗定陵

實錄萬曆四十八年七月丙申上崩于乾清宮十月丙午葬定陵

燕都將覽志神宗顯皇帝陵曰定陵在康陵之南東

向田大受謁陵記曰踰椽子嶺而北是為定陵

湧幢小品神皇壽宮皆種栢子松

昌平山水記定陵在大峪山距昭陵北一里自昭陵  
五空橋東二百步分北為定陵神路長三里路有石  
橋三空陵東向碑亭東有橋三道皆一空制如永陵  
其不同者門內神厨庫各三間兩岸各七間三重門  
旁各有牆牆有門不升降中門之級殿後有石闌一  
層而寶城從左右上榜曰定陵碑曰大明神宗顯皇



帝之陵

芹城小志定陵葬神宗範天合道哲肅敦簡光文章  
武安仁止孝顯皇帝孝端貞恪莊惠仁明婉天毓聖  
顯皇后王氏孝靖溫懿敬讓貞慈皇后王氏

光宗慶陵

實錄泰昌元年九月朔上崩天啓元年九月初四日  
葬慶陵

芹城小志光宗貞皇帝陵曰慶陵在裕陵西南俗傳

為景泰窪是也先是景泰中建為壽宮英宗復辟景  
皇帝遂葬西山之麓陵基遂虛光宗上賓既速倉卒  
不能擇地乃用此為陵

熹宗實錄天啓元年禮部左侍郎署尚書事周道登  
疏言昭陵舊制祔恩殿正當龍砂之上形家謂龍砂  
不可損傷有謂獻陵享殿亦在龍砂之外今營建規  
制原倣昭陵而斟酌地勢兼參獻陵

陵工紀事陵寢有後殿中殿前殿重門相隔有為門

之樞紐者曰銅管扇冶鑄甚艱舊例責內侍監造時  
因慶陵擇定九月初四日寃安內侍以期太迫再四  
規避工部尚書劄臣萬燦董其事甫一月而功成

昌平山水記慶陵在天壽山西峯之右距獻陵西少  
北一里自裕陵神路小石橋下分東北為慶陵神路  
長二十餘步有橋一道一空制如獻陵平刻龍鳳殿  
柱飾以金蓮殿無後門殿後繚以垣門一道門北有  
橋三道皆一空其水自殿西下殿門西又有一小橋

為行者所繇殿北過橋有土岡自東而來至神路而止岡後周垣門三道如獻陵寶城東西直上至中復為角道而入榜曰慶陵碑曰大明光宗貞皇帝之陵殿門前及垣內樹四五百株

芹城小志慶陵葬光宗崇天契道英睿恭純憲文景武淵仁懿孝貞皇帝孝元昭懿哲惠莊仁合天弼聖貞皇后郭氏孝和恭獻溫穆徽慈皇后王氏孝純淵靜慈肅皇后劉氏

崇禎遺錄上諭禮部朕惟慶源有自禮必隆於所生  
孝思永言施必由於親始典闢教化義重彝倫章憲  
俱存聲稱宜亟我聖妣貞靜賢妃芬降華宗躬膺令  
德徽音夙稟於女史婉懿早著於青蒲在昔皇考毓  
我弟昆蓋華萼共輝於連枝而顧復各勤於離裏我  
皇兄纂承祧之重既篤於濬源逮眇躬荷世及之庥  
亦深於惓慕欲酬罔極宜備追崇正儷體之鴻稱舉  
遷祔之上典爾禮部其會官詳議以聞於是尊謚聖

母孝純淵靜慈肅毗天鍾聖皇后祔葬慶陵

熹宗德陵

五朝注畧天啓七年八月乙卯上崩于乾清宮崇禎元年三月己巳葬德陵

燕都游覽志熹宗愍皇帝陵曰德陵在永陵之東北即永陵之虎沙也陵獨西向與昭定二陵相對旁有竇禹錫手植槐

昌平山水記德陵在檀子峪距永陵東北一里自永

陵碑亭前分北為德陵神路陵西南向碑亭前有橋  
三道皆一空制如景陵平刻龍鳳殿柱飾以金蓮殿  
無後門榜曰德陵碑曰大明熹宗愍皇帝之陵殿樓  
門亭俱黃瓦

芹城小志德陵葬熹宗達天闡道敦孝篤友章文襄  
武靖穆莊勤愍皇帝

莊烈愍皇帝思陵

國權崇禎十五年七月癸未皇貴妃田氏薨輟朝三

日十七年正月壬子葬皇貴妃田氏

昌平山水記鹿馬山有田貴妃墓南距西山口一里  
崇禎十五年七月妃薨葬此遣工部左侍郎陳必謙  
等營建未畢而都城失守賊以帝后梓宮至昌平州  
士民率錢募夫葬之田妃墓內移田妃於右帝居中  
后居左以田妃之槨為帝槨斬蓬藿而封之門外右  
為司禮太監王承恩墓以從死祔焉

白頭閒話 思陵既殉社稷福藩在金陵上尊謚曰思



宗紹天繹道剛明恪恭揆文奮武敦仁茂孝烈皇帝  
尋又改謚毅宗唐藩在閩又改謚威宗至

本朝初謚曰懷宗端皇帝後乃更謚曰莊烈愍皇帝  
肅松錄順天府昌平州署吏目事省祭官趙一桂為  
開墳捐葬崇禎先帝及周皇后共歸田妃陵寢事恭  
照明陵坐當昌平州天壽山卑職於崇禎十七年正  
署州捕遭際都城陷沒故主縊崩至三月二十五日  
順天府偽官李紙票為開墳事仰昌平州官吏即動

官銀僱夫速開田妃壙安葬崇禎先帝及周皇后梓宮四月初三日發引初四日下葬母違時刻未便彼時州庫如洗監葬官禮部主事許作梅因葬主限迫亦再三躊躇卑職與好義之士孫繁祉白紳劉汝朴王政行等十人共捐錢三百四十千僱夫啓閉其壙中隧道長十三丈五尺濶一丈深三丈五尺督修四晝夜至初四日寅時始見壙宮石門用拐釘鑰匙推開頭層石門入內香殿三間陳設祭器中有石香案

兩邊列五色紬緞侍從宮人生前所用器物衣服俱在大紅箱內盛貯中懸萬年燈二盞殿之東間石寢牀一座鋪設裁絨氊上疊被褥龍枕等件又開二層石門入內通長大殿九間石牀長如前式高一尺五寸濶一丈田妃棺槨即居其上初四日申時後故主靈到即傳于祭棚內陳猪羊金銀紙劄祭品同衆舉哀祭奠下葬卑職親領夫役入壙宮內即將田妃移於石牀之右次將周后安於石牀之左後請崇禎先

帝之棺居於正中田妃葬於無事之時棺槨俱備監  
葬官與卑職見故主有棺無槨遂將田妃之槨移而  
用之三棺之前各設香案祭器畢卑職親手將萬年  
燈點起遂將二座石門關閉當時掩土地平尚未立  
冢至初六日率捐葬鄉耆等祭奠號泣震天逾時方  
止卑職差人傳附近西山口地方撥夫百名各備掀  
掘筐擔昇土築完卑職同生員孫繁祉亦捐資五兩  
買磚修築周圍冢牆高五尺有奇幸

清朝定鼎特遣工部復將崇禎先帝陵寢修建香殿三  
間羣牆一週使大明故主不致淪沒於荒郊君后升遐猶享  
血食於後世雖三代開國不逾是也計開劉汝朴錢五十  
千白紳錢三十千徐魁錢三十千李失名錢五十千鄧  
科錢五十千趙永健錢二十千劉應元錢二十千楊  
道錢二十千王政行錢二十千 思陵碑亭南北四  
丈八尺東西如之宮門三距亭十一步階三惟中門  
有棟宇廣二丈四尺修三丈饗殿距門十三步階三

無臺殿三楹廣七丈二尺修四丈二尺內香案一青琉璃五器全設一神牌高二尺五寸石青地雕龍邊以金泥之題曰大明欽天守道敏毅敦儉弘文襄武體仁致孝莊烈愍皇帝中楹為煖閣長榻六扇中供木主三中則莊烈愍皇帝左則周后右則田妃外俱用櫨冒之周后神主題曰大明孝敬貞烈慈惠莊敏承天配聖端皇后田妃神主僅存恭懿二字餘被人磨去矣配殿三楹俱黑瓦殿前大杏樹一株陵寢門

三距殿址四步穴牆為門中廣二丈四尺修一丈二尺旁則戶矣明樓距門十一步不起樓階四中開一門左右夾窗二碑石廣一丈六尺脩六尺雕龍方座高丈許題曰莊烈愍皇帝之陵石凡距樓十步長五尺博二尺几前石器五俱高八尺方式雕龍中一方鼎與諸陵異皆列在地寶城距几甚近無城周廻用牆高六尺中以石灰起冢高四尺繚以短牆左松八株右松七株

北游紀方思陵神碑高二尺五寸石青地雕龍金字  
書大明欽天守道敏毅敦儉弘文襄武體仁致孝莊  
烈愍皇帝其神主則書大明懷宗欽天守道敏毅敦  
儉弘文襄武體仁致孝莊烈愍皇帝神主之左為周  
后主上書大明孝敬貞烈慈惠莊敏承天配聖端皇  
后右為田妃主上書恭淑端慧靜懷皇貴妃主俱長  
不滿尺白櫝冒之

肅松錄甲申四月密雲副將張減率所部兵至昌平



城下繫血書於矢射城中於是生負孫繁祉同鄉官  
王廷授舉人楊春茂監生白紳生負揚應震毛應元  
鄉民白希顏等倡義滅於五月朔攻城城中饗應自  
卯至午與賊戰斬級百餘生擒賊一百二十名墜城  
死者無算奪騾馬六十匹隨於次日同赴長陵祭奠  
縛賊渠李道春周祥磔之以偽官劉愷澤等四人獻  
俘於崇禎皇帝陵墓之側亦磔之具文哭奠焉

甲申傳信錄御馬監太監王承恩順天人大同告陷

上命承恩提督京營內外軍務居督府之上三月十八日夜承恩執鎗隨駕奪門不得出還至萬歲山下從上對縊於巾帽局而死王之心者舊司禮監掌印太監亦順天人甲申二月廷議助餉衆言之心富甚家藏銀三十萬時之心閒住已久上即日召諭之心以家計消乏為辭次日進銀一萬兩泊李自成入繫之搜掠銀十五萬餘以未足三十萬之數考掠至死他書有言之心自殉者故詳其實附志於此又有

言殉難為王之俊者益謬之俊於甲申冬同曹化淳  
共證偽太子事丁亥四月乘馬於道人猶見之傳說  
之偽如此

肅松錄長陵獻陵裕陵茂陵慶陵俱癸山丁向景陵  
永陵俱艮山坤向泰陵壬山丙向康陵辛山乙向昭  
陵乾山巽向定陵戌山辰向德陵甲山庚向思陵子  
山午向

昌平山水記長陵有東西二井東井在德陵東南饅

頭山之南西向西井在定陵西北東向並重門門三道殿三間兩廡各三間綠瓦周垣會典言長陵十六妃從葬位號不具其曰井者蓋不隧道而直下也自英宗止宮人從葬於是妃墓始名其在陵山內者昭陵之左九龍池南為蘇山有萬貴妃之墓東向憲宗妃也又南為銀錢山有鄭貴妃暨二李劉周四妃之墓南向神宗妃也又南為襖兒峪有四妃二太子墓中閭妃王妃左馬妃次左哀冲太子右楊妃次右莊

敬太子世宗妃太子也又南為悼陵東南向孝潔皇  
后陳氏初謚悼靈葬此世廟崩遷永陵而其封兆尚  
存旁有沈文廬三妃之葬至今猶曰悼陵云東山口  
迤東有劉惠妃墓英宗妃也又東八里綿山有蘄獻  
王滕懷王墓仁宗子也凡陵及妃嬪太子諸王之葬  
及上所御殿其外垣皆塗以紅土 十二陵各有宰  
牲亭祠祭署朝房神馬房果園神宮監又各有衛領  
左右中前後五千戶所主率領軍士防護陵寢其公

署皆在州城中

兩朝從信錄諸陵神宮監軍巡山軍巡邏軍夜不收  
軍黃土軍行宮軍天橋軍圪墳軍本戶軍御馬監軍  
御女軍朝房看料軍金錢山軍并悼陵軍李貴妃墳  
軍共六千二百四名

肅松錄長陵果園在神仙洞北獻陵園在州南門外  
少西景陵園在山北裕陵園在景陵園西茂陵園在  
大松園西泰陵康陵園俱在大紅門永陵園在神仙

洞前昭陵園在西山口定陵園在州西門外御路西  
慶陵園在白浮村德陵園在州西門迤南長陵獻  
陵榛廠俱在渤海所景陵廠在韋村裕陵泰陵廠俱  
在懷柔縣茂陵永陵昭陵定陵廠俱在密雲縣康陵  
廠在紅川柳溝慶陵廠在平谷縣德陵廠在薊州盤  
山

太常紀長陵祠祭署建於神宮監之南中為公座左  
右小房前為署門永樂七年建獻陵祠祭署建於宰

牲亭之左中為公座左右為官舍前為門洪熙元年  
建景陵祠祭署建於宰牲亭之右中為公座後為官  
舍前為門宣德十年建裕陵祠祭署建於宰牲亭之  
左中為公座左右楹為官舍前為門天順八年建茂  
陵祠祭署建於宰牲亭之左制如裕陵成化二十三  
年建泰陵祠祭署建於宰牲亭之左制如裕陵弘治  
十八年建康陵祠祭署建於宰牲亭之左中為公座  
後為官舍前為門正德十六年建永陵祠祭署建於



宰牲亭之左制如康陵嘉靖十五年建昭陵祠祭署  
建於宰牲亭之左制如永陵萬曆元年建定陵祠祭  
署建於宰牲亭之左制如昭陵萬曆十一年建慶陵  
祠祭署建於本陵橋南向東制如定陵天啓元年建  
德陵祠祭署建於宰牲亭之左制如永陵崇禎元年  
建

附  
睿宗顯陵

太常紀睿宗獻皇帝葬承天府松林山薦陵名曰顯

陵嘉靖十年封其山為純德十八年獻皇后薨上將  
奉梓宮南祔遂巡承天相度吉兆立表於獻皇帝寢  
宮之北勅臣工營之五月上遣使南送梓宮以閏七  
月至啓巖宮合葬設顯陵衛神宮監祠祭署  
名勝志純德山舊名松林山興獻帝陵寢在焉欽定  
號列於五鎮之次

讀禮通考卷九十三

欽定四庫全書

經部

讀禮通考卷九十四

詳校官監察御史臣劉湄

給事中臣溫常綬覆勘

總校官編修臣王燕緒

校對官編修臣汪鏞

謄錄監生臣翟灝

欽定四庫全書

讀禮通考卷九十四

刑部尚書徐乾學撰

葬考十二

上陵

後漢書祭祀志古不墓祭漢諸陵皆有園寢承秦所為也說者以為古宗廟前制廟後制寢以象人之居前有朝後有寢也月令有先薦寢廟詩稱寢廟奕奕言相通也廟以藏主以四時祭寢有衣冠几杖象生之具以薦

新物秦始皇出寢起於墓側漢因而弗改故陵上稱寢殿起居衣服象生人之具古寢之意也建武以來關西諸陵以轉久遠但四時特牲祀帝每幸長安謁諸陵乃太牢祀自雒陽諸陵至靈帝皆以晦望二十四氣伏臘及四時祀廟日上飯太官送用物園令食監典省其親陵所宮人隨鼓漏理被枕具盥水陳嚴具

世祖紀建武六年夏四月丙子幸長安始謁高廟遂有

事十一陵

有事謂祭也左傳曰有事于太廟高祖長陵惠帝安陵文帝霸陵景帝陽陵武帝茂陵昭

帝平陵宣帝杜陵元帝渭陵成  
帝延陵哀帝義陵平帝康陵

十年秋八月己亥幸

長安祠高廟遂有事十一陵 十八年春三月壬午祠

高廟遂有事十一陵 二十二年春閏月丙戌幸長安

祠高廟遂有事十一陵

明帝紀永平元年春正月帝率公卿以下朝於原陵如

元會儀

乾學案漢不師古諸帝之廟不立於京師而  
各立於陵側故有朔望及時節諸祭此實祭

廟非祭陵也又皆祠官致祭天子不親行即世祖祭長安諸陵止因巡幸而祭之亦非特祭其率百官而特祭於陵實自明帝始也

通典後漢都雒陽以關西諸陵久遠但四時特牲祀每帝西幸即親謁其雒陽陵每正月上丁祀郊廟畢以次上陵百官四姓親家婦女公主諸大夫外國朝者侍于郡國計吏會陵畫漏上水大鴻臚設九賓隨立寢殿前鐘鳴謁者贊禮引客羣臣就位如儀乘輿自東廟下太

常道出西向拜折旋升階拜神座退後公卿羣臣謁神  
座太官上食太常樂奏食畢舞文始五行之舞樂闋羣  
臣受賜食畢郡國上計吏以次前當神軒告其郡國穀  
價人所疾苦欲神知其動靜孝子事親盡敬愛之心也  
最後親陵遣計吏賜之帶珮八月飲酎上陵禮亦如之  
至靈帝皆以弦晦二十四氣伏社臘及四時祀祠廟日  
上飯太宮人隨鼓漏理被枕盥水陳嚴具

謝承後漢書靈帝建寧五年正月車駕上原陵蔡邕為



司徒掾從公行到陵見其儀愜然謂同座者曰聞古不  
墓祭朝廷有上陵之禮始謂可損今見其儀察其本意  
乃知孝明至孝惻隱不可易舊或曰本意云何昔在長  
安時其禮不可盡得聞也光武即世始葬於此明帝嗣  
位踰年羣臣朝士感先帝不復聞見此乃躬帥公卿百  
僚就園陵而創焉尚書階西祭設神座天子事亡若存  
之意也以帝聖孝之心親服三年又在園陵初興此儀  
仰察几筵下顧羣臣悲切之心必不可堪邕見太傅胡

廣曰國家禮有煩而不省者昔不知先帝用心周密之  
至於此也廣曰然子當載之以示學者邕退而記焉

胡寅曰送死之禮即遠而無近至於墓則終事盡矣  
人子孝思不忘則專精於廟享而已矣蓋墓藏體魄  
而致生之是不知也廟以宅神而致死之是不仁也  
此聖人制禮明乎幽明之故仁智合而禮義盡也既  
以送形而往安於地下迎精而反主於廟中而又致  
隆於陵園如元會儀上食奏樂郡國奏計言民疾苦

是反易陵廟之理以體魄為有知虛廟祏而不重皆違禮也明帝此舉蓋生於原廟蔡邕不折衷於聖人之制而直論其情情豈有既哉

通典魏文帝詔曰先帝躬履節儉遺詔省約予以述父為孝臣以繼事為忠古不墓祭皆設於廟先帝高平陵上殿皆毀壞車馬還廐衣服藏府以從先帝儉德之志遂革上陵之禮及齊王在位九載始一謁高平陵

晉書禮志宣帝遺詔子弟羣官皆不得謁陵於是景文

遵旨至武帝猶再謁崇陽陵一謁晉平陵然遂不敢謁  
高原陵至惠帝復止也逮於江左元帝崩後諸公始有  
謁陵辭告之事蓋由眷同友執率情而舉非洛京之舊  
也成帝時中官亦年年拜陵議者以為非禮於是遂止  
以為永制至穆帝時褚太后臨朝又拜陵帝幼故也至  
孝武崩驃騎將軍司馬道子曰今雖權制服至於朔望  
諸節自應展情陵所以一周為斷於是至陵變服單衣  
煩黷無準非禮意也及安帝元興元年尚書左僕射桓

謙奏百僚拜陵起於中興非晉舊典積習生常遂為近法尋武皇帝詔乃不使人主諸王拜陵豈惟百僚謂宜遵奉於是施行及義熙初又復江左之舊

宋書及通典俱不載

武帝泰始二年八月詔曰此上旬先帝棄天下日也便以周年吾煢煢當復何時一得叙人子之情邪思慕煩毒欲詣陵瞻侍以盡哀憤主者具行備太宰安平王孚尚書令裴秀尚書僕射武陟等奏陛下至孝蒸蒸哀思罔極哀麻雖除哀毀疏食有損神和秋節尚有餘暑謁

見山陵悲感摧傷羣下竊用竦息以為宜降抑聖情以  
慰萬國詔曰孤梵忽爾日月已周痛慕摧感永無逮及  
欲瞻奉山陵以叙哀憤體氣自佳耳又已涼便當行不  
得如所奏也主者便具行備又詔曰漢文不使天下盡  
哀亦帝王至謙之志當見山陵何心而無服其禮以哀  
經行秀等重奏曰臣聞上古喪期無數後世乃有年月  
之漸漢文帝隨時之義制為短喪傳之於後陛下社稷  
宗廟之重萬方億兆之故既從權制除哀麻羣臣百姓

吉服今者謁陵以叙哀慕若加哀經進退無當不敢奉  
詔詔曰亦知不在此麻布耳然人子情思為欲令哀喪  
之物在身蓋近情也羣臣自當案舊制秀等又奏曰臣  
聞聖人制作必從時宜故五帝殊樂三王異禮此古今  
所以不同質文所以迭用也陛下隨時之宜既降心克  
已俯就權制既除哀麻而行心喪之禮今復制服義無  
所依若君服而臣不服亦未之敢安也參議宜如前奏  
詔曰患情不能跂及耳衣服何在諸君勤勤之至豈苟

相違

宋書自元嘉以來每歲正月輿駕必謁初寧陵復漢儀也世祖太宗亦每歲拜初寧長寧陵

魏書太和十六年九月辛未高祖哭於文明太后陵左終日不絕聲素幕越席為次侍臣侍哭壬申高祖以忌日哭於陵左哀至則哭侍哭如昨帝二日不御膳癸酉朝中夕三時哭拜於陵前夜宿覽玄殿是夜徹次甲戌帝拜哭辭陵還永樂宮



通典唐貞觀十三年太宗朝于獻陵先是日宿設黃麾  
仗周衛陵寢至是質明七廟子孫及諸侯百僚蕃夷君  
長皆陪列於司馬門內太宗至小次降輿納履哭入闕  
門西再拜慟絕不能興禮畢改服入於寢躬親執饌閱  
視高祖先后服御之物悲慟左右侍御者莫不歔歔禮  
畢太宗自出寢宮步過司馬門泥行二百餘步上入寢  
哭踊絕於地進至東階西向再拜號慟久之乃進太牢  
之饌加珍羞具品引太尉無忌司空勣越王貞趙王福

曹王明及左屯衛將軍程知節並入執爵進俎上至神  
座前拜哭奠饌閱先帝先后衣服拜辭訖行哭出寢北  
門乃御小輦還宮 高宗永徽二年有司言謹案獻陵  
三年之後每朔及月半上食其冬夏至伏臘清明社節  
等日亦上食其昭陵請依獻陵故事上從之六年正月  
謁於昭陵有司先設儀衛於陵寢質明七廟子孫二王  
後百僚州鎮蕃牧四夷君長等並陪列於位皇帝降輦  
入次易服出次行哭就位再拜擗踊慟絕禮畢又改服

奉謁寢宮其妃嬪公主先於神座左右侍列如平生帝  
入寢門即哭瞻視幄座踊絕於地進至東階西面再拜  
號哭乃進牢饌珍羞引三公諸王入執爵進俎帝至神  
座前再拜哭自奠饌閱先帝先后衣服更增感絕拜辭  
訖行哭出寢北門 中宗景龍二年是時每日奠祭太  
常博士彭景直上疏曰謹案三禮正文無諸陵日祭之  
事又案禮論譙周祭志云天子之廟始祖及高祖祖考  
皆每月朔加薦新以象平生朔食也謂之月祭二祧之

廟時祭無日祭此譙周所著與古禮義合本無日祭之  
文今諸陵月祭有朔食月半并諸節日科則古禮殷事  
之義矣諸節日猶薦新之義矣故玄注禮記云殷事朔  
日月半薦新之奠也又注儀禮云月朔月半猶平常之  
朝夕也大祥之後即四時焉此則古者祭皆在廟近代  
以來始分月朔月半及諸節日祭於陵寢至後漢陵寢  
致祭無明文以言自魏三祖以下不於陵寢致祭並符  
於古禮至於江左亦不崇園寢及齊梁陳其祭無聞今

參詳以為三禮者不刊之書懸諸日月外傳所記不與經合不可依憑其諸陵請準禮停日祭帝曰禮因人情事有沿革陵寢如昨祇薦是常乍覽此奏但增哀慕乾陵宜依舊朝晡進奠昭獻二陵每日一進以為恒式

舊制每年四季之月常遣使往諸陵起居是日太常博士唐紹上疏曰自安宅兆禮不祭墓當謂送形而往山陵為幽靜之宮迎精而返宗廟為享薦之室但以仲月命使巡陵鹵簿衣冠禮容必備自天授以後時有起居

因循至今乃為常事起者以起動為稱居者以居止為名參候動止何如義非陵寢之法生事以禮必勤於定省死葬以禮宜閔於安厝豈可以事居之道行送往之禮敢辭命使勞繁但恐不安靈域又降誕之日穿鍼之辰皆以續命為名時人多有進奉今聖靈日遠仙駕難攀進止起居恐乖先典請停四季及降誕并節日起居陵使但準式二時巡陵庶幾合禮經陵寢安謐不從

玄宗開元二十年四月制曰寒食上墓禮經無文近代

相傳寢以成俗士庶有不合廟享何以用展孝思宜許  
上墓同拜埽禮於瑩南門外奠祭饌訖泣辭食餘饌任  
於他處不得作樂仍編入五禮永為恒式二十三年四  
月勅顯昭乾定橋恭六陵朔望上食歲冬至寒食日各  
設一祭如節祭共朔望日相逢依節祭科橋陵除此日  
外仍每日進半口羊食天寶二年七月勅曰朕承丕業  
肅恭祀事至於諸節常修薦享且詩著授衣令存休澣  
在于臣子猶及恩私恭事園陵未標令式自今以後每

至九月一日薦衣於陵寢貽範千載庶展孝思且仲夏  
端午事無典實傳之淺俗遂乃移風況乎以孝道人因  
親設教變游衣於漢紀成獻服於禮文宣示庶僚令知  
朕意

開元禮皇帝拜五陵將拜陵所司承制內外宣攝隨職  
供辦前發二日太尉告太廟如常儀將作預修理拜謁  
之所及寢宮務極潔敬不得喧雜尚舍直長去陵十里  
所設行宮奉御鋪御座齋室如常儀守宮設從駕百官



及皇親諸親客使位及次如常儀尚舍又於謁拜陵所  
道西量設小次又於寢宮前之西南設大次東向御座  
如常儀守宮量設侍臣次於大次西南又設羣官應陪  
位者次于侍臣次之西南隨地之宜皆東向也一文官

在北武官在南朝集使于武官之南尚食預備太牢之

饌珍羞庶品務極豐潔

太常滌琬牲牢及菜盛光祿司農及長祠人供辦如式

拜

謁前一日皇帝至行宮詣齋室仗衛如式陵令以玉冊  
進御署訖近臣奉出陵令受訖奉禮設御位于陵東南

隅西向

其有山谷隱膜則隨地設位望陵而拜

又設位于寢宮之內寢殿

東階之東南西向又設百官位于陵所行從官皇親諸

親及客使等分方位于神道之左右相對為首寢宮所

于大次之前分方序立如常並隨地之宜拜謁日未明

五刻諸衛量設黃麾大仗於陵寢陳布

諸陵寢舊宿衛人各依本職掌

不得移動未明三刻行從百官及皇親五等以上諸親三等

以上并客使等應陪位者俱就位侍中版奏請中嚴

其布

位及進嚴典儀相贊設之

近仗就陳如常未明一刻侍中版奏外辦

皇帝素服乘馬以出勅侍臣上馬曲直華蓋繖扇侍衛如常儀詣陵西南小次所司控馬以入少頃侍中版奏外辨皇帝步出次博士引太常卿太常卿前導皇帝至位立太常卿前奏請再拜

博士與太常卿退立于後

皇帝再拜太常

卿又前奏請再拜皇帝又再拜

有位無哭

奉禮曰再拜贊者

承傳陪位者皆再拜又再拜訖

凡贊拜進退皆通事舍人贊相以後準此

少

頃太常卿前奏請辭皇帝再拜又再拜奉禮白贊者承

傳陪位者再拜又再拜太常卿引皇帝還小次乘馬出

次勅侍臣上馬儀仗侍衛詣寢宮皇帝從陵迴詣大次  
乘馬以入其仗衛等各立以俟其行從百官及皇親諸  
親并客使等並依位序立於大次之前所司嚴潔具酒  
饌侍中版奏外辦皇帝步出大次博士引太常卿太常  
卿前導皇帝至寢宮南門仗衛停于門外

其應從入之  
官臨時奏聽

進博士引太常卿前導皇帝入內門取東廊進至寢殿  
東階之東南西向立定太常卿前奏再拜訖引皇帝升  
東階當神座前北面再拜訖又當皇后神座前再拜訖

入進省服翫拂拭牀帳勅所司進太牢之饌加備珍羞

陳設

若有太子諸王公主陪葬柩城內並於寢殿東廊下所司致祭功臣陪祭者於東廊下各奠饌布位

量定獻官行事

太常卿引皇帝出詣酒尊所司酌酒進

其尊站陳於堂

戶外之東南如常儀

皇帝入奠酒三爵訖當神座前北面立太祝

二人對持玉冊於室戶外之右東向跪讀文訖皇帝再

拜又再拜若更進奠服翫即躬自執陳訖太常卿引皇

帝出戶當神座前北面立太常卿奏請辭皇帝再拜又

再拜訖太常卿引皇帝出中門太常卿前奏請權停

其從

官及行事官並其守宮使內侍官引內官帥寢宮內人  
出大門外奉候

謁見訖皇帝出侍衛如常儀還大次少頃若猶宿即乘

馬還行宮若更向前陵即於大次便進發

皆近侍預奏  
取進止與仗

衛計  
會

皇后拜五陵所司預設大次於寢宮之東隨地之宜東

向鋪御座如常入設先朝妃嬪次於大次之南守宮設

大長公主長公主及諸親婦人命婦等次於妃嬪之南

皆東向及拜謁之處皆障以行帷前一日內謁者設中

宮御位於寢宮東次前近東東向又設先朝妃嬪以下位於御位西南各於其次之東皆重行東面以北為上又設司贊位於妃嬪東北東面掌贊二人在南差退

皇帝發行宮後皇后乘四望車如常行之式發行宮大次改服假髻白練單衣服內典引各引妃嬪以下就位

立訖內侍版奏外辦司宮引尚宮尚宮引皇后

每尚宮前導皆

司宮出就位

尚服負琮寶以從如式

立定尚儀前奏再拜退復位

皇后再拜司贊曰再拜掌贊承傳諸陪位者皆再拜少

頃尚儀又前奏請再拜辭皇后再拜司贊曰再拜掌贊承傳諸陪位者皆再拜尚宮引皇后還大次謁寢宮如常儀皇后初還大次內典引各引陪位者退皇后拜陵訖於寢宮東大次改服鈿釵禮衣

若服常服臨時聽進止

乘輿詣

寢宮尚服負琮寶以從侍衛如常先朝妃嬪大長公主長公主陪從如常式至寢宮北門降輿入大次皇后既入寢宮尚宮引皇后侍從如常詣寢殿前西階之西東面立其妃嬪公主等陪從立於皇后之西南皆東面北



上又設司贊位於妃嬪東北東面掌贊二人在南差退在位者立定尚儀前奏再拜皇后再拜司贊曰再拜掌贊承傳妃嬪以下皆再拜訖尚宮引皇后升自西階入

室

妃嬪公主等仍立於階下

詣先帝神座前北面再拜訖尚宮又引

皇后詣先帝皇后神座前北面再拜訖尚宮引皇后進省先后服翫訖引退西廂東面立進食訖皇帝出尚宮引皇后從出降自西階復階下位尚儀奏再拜辭皇后再拜訖司贊曰再拜掌贊承傳諸陪位妃嬪等皆再拜

尚宮引皇后之大次更衣妃嬪以下皆更衣皇帝過皇后出寢宮北門乘四望車還行宮侍從如來儀

附  
公卿巡陵

唐會要高宗顯慶五年二月二十四日上以每年二時太常卿少卿分行二陵事重人輕文又不備鹵簿威儀有闕乃詔三公行事太常卿少卿為副太常造鹵簿事畢則納於本司仍著於令 開元十五年二月二十四日勅每年春秋二時公卿巡陵初發準式其儀仗出城

欲至陵所十里內還具儀仗所須馬以當界府驛馬充其路次供遞車兩來載儀仗推輅三十人餘差遣並停所司別供須依常式 二十七年八月十二日勅古者分命公卿巡陵率皆乘輅以備其儀雖則是常不可廢闕而事有適要亦在變通宜令太僕等司每陵各支輅兩乘并儀仗等送之陵所貯掌既免勞煩無虧肅敬其公卿出城日如常儀至陵所準此 二十八年七月十八日制伏以八代祖宣皇帝七代祖光皇帝六代祖景

皇帝五代祖元皇帝自昔追尊號謚稽古有則而陵寢  
所奉須廣彛章其建初起運二陵仍準興寧陵例置署  
官及陵戶自今以後每歲至春秋仲月宜分命公卿準  
諸陵例分往巡謁仍命每司準數造輅於陵署收掌以  
充備禮之用其建初起運興寧永康等四陵年別四時  
及八節委所由州縣數與陵署相知造食進獻 天寶  
六載八月一日勅每年春秋二時巡謁諸陵差公一人  
卿一人奉禮郎一人右校署令一人其奉禮郎右校署

令自今後宜停至陵所差縣官及陵官攝行事其廵陵儀注宜令太常寺修撰一本送令管陵縣收掌長行用仍令博士助教習讀臨時贊相永為常式 貞元四年

二月國子祭酒包佺奏每年二月八月差公卿等朝拜諸陵伏見陵臺所由引公卿至陵前其禮簡畧因循已久恐非盡敬謹案開元禮自公卿拜陵舊儀望宣傳所司詳定儀注稍令備禮以為永式勅旨宜令所司酌禮量宜取其簡敬於是太常約用開元禮制及勅文舊例

修撰五月勅旨施行所司先擇吉日公卿待輅車鹵簿  
就太常寺發至陵所司於陵南北步道東設次西向北  
上公卿等到次奉禮設公卿位於北門外之左西向陵  
官在公卿位東南執事官又於其南西向北上設奉禮  
位於陵宮西面贊者二人在南少退謁者引公卿出次  
就位贊引諸官就位立奉禮曰再拜贊者承傳在位者  
俱再拜謁者引公卿贊引引諸官出次以奉行畢退復  
位奉祭禮曰再拜贊者承傳在位者皆再拜謁者引公

卿贊引引諸臣各就次以還若須灑埽及芟薙修理即  
隨事處分其奉禮郎典謁等應須權攝請準天寶六載  
八月勅所管縣及陵官博士助教等充又準開元皇帝  
行諸陵即設太牢之饌其公卿朝拜備奉巡檢之禮並  
無牲牢元和元年正月禮儀使杜黃裳奏二月公卿拜  
諸陵準禮太上皇升遐準祭天地社稷其拜陵及諸饗  
祀並令權停制曰可長慶元年六月二十七日吏部  
奏公卿拜陵通取尚書省及四品以上清望官中書省

及諸司五品以上清望官及京兆少尹充從之三年正月御史臺奏應差定拜陵公卿伏請除準式假令如吏部差定奏下後稱疾患事故者望同臨祭出齋例論罰又應拜陵公卿正衙辭後並合當日出城近來因循轉不遵守動經累日止宿於家受命不恭莫甚於此臣請申明舊制因事制酌宜計其道程前後辭發奏可

記曰案開元禮春秋二仲月司徒司空巡陵春則埽除枯朽秋則芟薙繁蕪埽除者當發生之時欲使茂



盛也芟薙者當秋殺之時除去擁蔽且慮火災也今  
廵陵公卿皆持斧擊樹三發謂之告神其為不經一  
何甚也

宋史禮志上陵之禮古者無墓祭秦漢以降始有其儀  
至唐復有清明設祭朔望時節之祀進食薦衣之說

五代諸陵遠者令本州長吏朝拜近者遣太常宗正卿  
或因行過親謁 宋初春秋命宗正卿朝拜安陵以太  
牢奉祠

太祖乾德三年始令宮人詣陵上冬服歲以為常開  
寶九年太祖幸西京過鞏縣謁安陵奠獻

太宗雍熙二年宗正少卿趙安易言昨朝拜安陵永昌  
陵有司止設酒脯香以未明行事不設燭燎又先赴永  
昌陵後赴安陵及帝后二位不徧拜頗愆於禮事下有  
司議曰案開元禮春秋二仲月司徒司空巡陵不設牲  
牢之祀今請如宗廟薦享少加裁減除不設登鉶牙槃  
食及太常登歌外餘悉如大祠朝拜日有司豫於陵南

百步道東設次具翦除器以備灑埽設宗正卿位於兆外之左西向設官位於卿之東南執事官又於其南俱西向北上設祭器禮料酒饌於兆門內宗正卿以下各就位再拜盥手奠酒讀祝冊再拜先赴安陵次永昌陵次孝明孝惠懿德淑德皇后陵從之

真宗景德三年帝將朝諸陵以宰臣王旦為朝拜諸陵大禮使太常禮院言朝陵故事合排小駕鹵簿唐太宗朝獻陵宿設黃麾仗周衛陵寢今請周設黃麾仗又唐

制前一日陵令以玉冊進御親書近臣奉出陵令受之  
今請造行冊四幅祝畢焚之其百官位舊設陵所從祝  
官及皇親客使分於神道左右貞觀中並陪列司馬門  
內今望準舊儀施行又舊儀詣寢宮至大次之時設百  
官位奏請行禮望令先入赴寢殿立班貞觀中皇帝至  
小次素服乘馬檢會今年正月車駕朝拜明德攢宮止  
服素白衣當時皇帝在大祥之內今既服除望止服淡  
黃袍又案貞觀永徽故事朝陵皆先親後尊拜辭訖出

還大次便進發今望先朝永熙陵行事及辭皇帝甘雨  
次再拜陪位官每陵亦各兩次再拜今請皇帝詣安陵  
參辭四度再拜永昌永熙陵各兩度設拜舊儀遂寢殿  
上食備太牢之饌珍羞庶品近以羊豕代太牢今請備  
少牢之祭設奠讀冊畢復詣寢宮上珍羞庶品別行致  
奠之禮又舊儀前發二日太尉告太廟今請依禮徧告  
六室詔特服素白衣行事次序如告太廟餘依所請四  
年正月車駕次鞏縣罷鳴鞭及太常奏嚴金吾傳呼既

至齋於永安鎮行宮太官進蔬膳是夜漏未盡三鼓帝  
乘馬却輿輦繖扇至安陵素服步入司馬門行奠獻禮  
諸陵亦然又詣下宮凡上宮用牲牢祝冊有司奉事下  
宮備膳羞內臣執事百官陪位又詣元德太后陵奠獻  
別於陵西南設幄殿祭如下宮禮畢徧詣孝明孝惠孝  
章懿德淑德明德莊懷七后陵遂單騎從內臣巡視陵  
闕而親奠夔魏岐郾安周六王及恭孝太子諸墳其三  
陵陪葬皇子皇孫公主之未出閭者及諸王夫人之蚤

亡者各設位次諸陵下宮之東序安陵百二十一墳量  
設三十位男子女子共祝版二昌陵十五墳量設十位  
熙陵八墳量設五位並祝版一以致祭焉辰後暫詣幄  
次更衣復詣諸陵奉辭有司以朝拜無辭禮帝不忍故  
復往仍遣官祭一品皇親諸親墓大中祥符四年正月祀  
汾陰經鞏縣有司請於訾村王臺設幄殿置三陵神坐  
皇帝鞞袍就幄設香酒時果牙盤食奠獻而命大臣以  
香幣酒脯詣諸陵致告駕還復行親謁之禮帝素服乘

馬至永安縣齋於行宮夜漏未盡二鼓詣三陵及元德  
太后明德皇后陵奠獻哀慟未明禮畢復詣四陵奉辭  
省視几筵奠獻如初禮又徧詣諸后陵諸王墳致奠命  
中使徧祭皇親諸親墳及汝州秦王墳是歲命禮官定  
春秋二仲遣官朝陵儀注以祭服行事專差宗正卿一  
員朝拜三陵別遣官二員分拜諸陵又制長竿檐牀二  
副置陵奉祝版遣寬衣軍士三十二人輿送陵下其後  
添差陵廟行禮官四員選朝官京官宗姓者充翰林學士



錢惟演言春秋朝陵載於舊式公卿親往蓋表至恭唐  
顯慶中始詔三公行事天寶以後亦遣公卿巡謁蓋取  
朝廷大臣不必須同國姓後參用太常宗正卿晉開運  
中亦命吏部侍郎近年以來止遣宗正等官人輕位卑  
實虧舊制望自今於丞郎諸司三品內遣官闕則差兩  
省諫舍以上所冀仰副追孝之心以成稽古之美景  
祐初滄州觀察使守節言寒食節例遣宗室拜陵而十  
月令內司賓往非所以致恭乃詔宗室正刺史以上一

貞朝拜四年減栢子戶安陵永昌永熙各留四十戶永定五十戶會聖宮十戶慶厯二年寒食十月朔宗室刺史以上聽更往朝陵皇祐三年太常博士李壽朋奏帝后諸陵薦饗皆有時獨昭憲皇后以合葬安陵不及時祭禮院言朝拜儀注牲牢並如太廟常饗例諸陵止奠一爵而安陵奠兩爵兩贊再拜惟祭饌不兼設蓋有司相承失之於是詔安陵昭憲皇后祝版牲幣御封香依太廟同室禮更造諸陵祭器貯別庫三陵皆置卒五百

人惟定陵以章獻太后故別置一指揮昭陵使甘昭吉引定陵例請置守陵奉先兩指揮京西轉運司請減定陵卒半以奉昭陵詔選募一指揮額五百人初永安縣官月朔朝定陵望朝三陵韓琦言昭陵未有朝日乃令縣官朔望分朝諸陵

神宗熙寧中詔文臣自兩省武臣閤門使以上經過陵下並許朝拜又詔自今臣僚朝拜諸陵除見任嘗任執政官許進湯餘止奠獻薦新不特拜初故事車駕詣陵

謂之親謁南渡之後此禮不舉故上陵或曰省視或曰保護或曰薦獻或曰祭告或曰致祭或曰望祭或曰修奉悉遣官不專於行禮也

高宗紹興元年六月太常寺言昭慈獻烈皇太后攢宮在越州會稽縣合依四孟朝獻禮例差宰執一員前一日赴攢宮泰寧寺宿齋至日行朝拜之禮詔同知樞密院事李回行禮二年三月知紹興府張守言昭慈顯烈皇后攢宮近在府界望許臣以時朝謁從之自是守臣

皆許朝謁三年正月禮部太常寺言春秋二仲薦獻諸陵乞於行在法惠寺設位望祭行禮從之自是每歲薦獻率循此制 十七年十一月殿中侍御史余堯弼言望舉行舊制於春秋二仲遣官詣永祐陵攢宮薦獻臣僚又言陵廟之祭月有薦新著在令典方今宗廟久已遵奉惟是永祐陵闕而未講望令有司討論舉而行之太常寺討論欲依政和五禮依典故令兩攢宮遵依每月檢舉差官行禮其新物令逐宮預行關報紹興府排

辦從之二十七年六月詔永祐陵及昭慈聖獻皇后攢  
宮檢察承受以檢察宮陵所為名三十年九月吏部言  
紹興府會稽知縣依倣陵臺令典故於階銜內帶兼主  
管攢宮事務量加優異

孝宗淳熙元年正月禮部太常寺言春秋二仲差太常  
少卿薦獻永祐陵攢宮并周視陵域如遇少卿有缺乏  
從本寺前期取指揮差本寺以次官充攝所有今年仲  
春薦獻即日見闕少卿差太常丞錢良臣自後春秋遇

少卿闕率以為例

寧宗慶元元年六月詔永阜陵孝宗皇帝攢宮每歲秋季一就令所差監察御史恭詣朝拜檢察從御史臺申請諸陵亦如之

政和禮春秋二仲薦獻諸陵儀時日 太常寺前期以

仲春擇日薦獻諸陵

仲秋準此

闕太史局擇日報太常寺參

酌訖具時日敬告

齋戒 獻官以下沿路宿於驛舍不弔喪問疾作樂決

罰罪人及與穢惡至陵宿於齋所唯薦獻事得行其餘  
悉禁前一日質明應行事執事陪位官並齋於陵所陵  
給酒饌獻官已齋而却者通攝行事

受香表 前期太常寺卿奉香表至鞏縣驛以香表置  
於腰輿與諸陵獻官以次從行至昭孝禪院禮直官引  
香表腰輿置於堂上贊者引諸陵獻官於堂上東向立  
禮直官引太常卿升堂西向立禮直官贊揖次贊者引  
永安陵獻官稍前東向對立贊者以表授太常卿太常



卿搢笏接表執笏以表加於笏上禮直官贊各俛伏跪  
太常卿授笏以表授永安陵獻官獻官搢笏接表訖各  
執笏獻官加表于笏上禮直官贊各俛伏興贊者引獻  
官退省視香表訖復置於腰輿從行至陵所次引諸陵  
獻官授香表如上儀

陳設 前一日都監常服率其屬詣陵闕宮殿門升殿  
行掃除於上降行掃除于下設神御座於殿上當中南  
面向

唯永安陵則設宣祖皇帝帝座稍西又設昭  
憲皇后座於宣祖皇帝之東俱南向也

陳香案

及供奉之物於座前訖闔宮殿門

永昌陵則先詣太祖皇帝陵陳設畢次詣

孝惠皇后孝明皇后孝章皇后陵永熙陵則先詣太宗

皇帝陳設畢次詣淑德皇后懿德皇后明德皇后元德

皇后陵永定陵則先詣真宗皇帝陵陳設畢次詣章懷皇

后章穆皇后章獻明肅皇后莊懿皇后章惠皇后陵永

昭陵先詣仁宗皇帝陵陳設畢次詣慈聖光獻皇后陵永

厚陵先詣英宗皇帝陵陳設畢次詣宣仁聖烈皇后陵永

裕陵先詣神宗皇帝陵陳設畢次詣欽聖憲肅皇后

欽成皇后欽慈皇后惠恭皇后陵陳設並如上儀又設

獻官以下次於門外薦獻日行事前陳表於案上在右

惠恭皇后

陳祀文

設揖位於殿門外獻官陪位官在西東向監

視禮事官太祝在東西向俱北上

凡設陪位官太祝位皆稍却

置燎

柴於爐內設望燎位於其北獻官陪位官在北南向西  
上監視禮事官在西東向太祝在東西向又設獻官席  
位於階東陪位官席位又於其南俱西向北上設監視  
禮事官席位于庭南北向太祝在其後又設獻官位于  
香案之北北向監視禮事官位於香案之西東向太祝  
位於香案之東西向

省饌 前一日獻官以下常服並集獻官齋所肄儀太  
祝集讀表文訖獻官詣厨閱饌物省鑊視滌既晡後都

監帥其屬臨造神饌

行事 薦獻日質明獻官以下常服並詣陵南門外就

次奉饌者各陳於外都監帥其屬闢宮殿門進饌者設

饌具畢都監還監視禮事官先入升殿點閱陳設糾察

不如儀者次禮直官贊者禮生分引獻官以下詣殿門

外揖位立定

凡太常卿行事禮直官引詣陵  
獻官行事贊者引餘皆禮生引

禮直官贊

揖訖

諸陵並同  
贊者準此

次引監視禮事官太祝入就殿庭席位

北向立次引獻官陪位官入就殿庭席位西向立禮直

官詣獻官之右贊請行事贊再拜在位者皆再拜次引  
監視禮事官太祝升就位次引獻官詣神御香案前執  
事者奉香獻官搢笏三上香執事者奉茶酒獻官跪執  
醖醑茶三祭酒皆以虛醖授執事者執笏俛伏興少退  
立太祝搢笏取表進詣神座右東向跪讀訖執笏興置  
表於案

惠恭皇后陵  
即讀祝文

獻官再拜俱降復位

準參安陵詣  
宣祖皇帝神

御香案前行禮畢次詣昭憲皇后  
神御香案前行禮畢並如上儀

禮直官曰再拜在位

者皆再拜次引獻官以下就望燎位執事者取表置於

燎柴

惠恭皇后陵  
即取祝文置

次引監視禮事官太祝就望燎位禮

直官曰可燎火燎半柴獻官以下詣殿門外揖位立定

禮直官贊禮畢揖訖退有司徹禮饌監視禮事官監視

收徹訖退

永昌陵則先詣太祖皇帝陵行事畢次詣孝惠皇后孝明皇后孝章皇后陵永熙陵則先

詣太宗皇帝陵行事畢次詣淑德皇后懿德皇后明德皇后元德皇后陵永定陵則先詣真宗皇帝陵行事畢

次詣章懷皇后章穆皇后章獻明肅后皇莊懿皇后章惠皇后陵永昭陵先詣仁宗皇帝行事畢次詣慈聖光

獻皇后陵永厚陵先詣英宗皇帝行事畢次詣宣仁聖烈皇后陵永裕陵先詣神宗皇帝行事畢次詣欽聖憲

肅皇后欽成皇后欽慈皇后太常卿徧詣諸陵及下宮

惠恭皇后陵行事並如上儀

朝拜訖周視陵域

應合掃除焚雜  
修治隨事處分

乃退

進獻諸陵上宮儀諸陵有司以元日中元冬至日節進

獻上宮

陳設 前一日都監常服帥其屬詣陵闕宮殿門升殿

行掃除於上降行掃除於下降設神御座於殿上當中

南面向

唯永安陵則設宣祖皇帝座於殿上稍西又  
設昭憲皇后座於宣祖皇帝之東俱南向

陳

香案及供奉之物於座前訖闔宮殿門

其詣諸陵次第與前篇同進

獻日行事前設都監位於庭北向又設望燎位於門外

都監南向香火內侍位其後

省饌 前進獻一日都監常服閱饌物詣厨省鑊視滌  
溉晡後帥其屬臨造神饌

行事 進獻日質明都監以下常服帥其屬詣陵闕宮

殿門以俟陳設畢奉饌者各陳於外進饌者序入都監  
香火內侍入就位再拜升殿都監詣香案前搢笏三上

香執笏少退再拜搢笏進湯次進酒饌恭奠於座前執

笏侍於側

俟進酒饌畢徹酒再酌酒進次味至少移故處並香火內侍俱應唯永安陵則先詣宣祖



皇帝神御香案前搢笏三上香執笏少退再拜訖次詣  
昭憲皇后神御香案前上香拜訖次逐位進湯進酒饌  
俟酌獻畢進表無即不進少頃進茶訖徹饌洒熄香火俱降

復位再拜出詣望燎位視燎畢闔宮殿門乃退其詣諸陵次第

與前  
篇同

進獻諸陵下宮儀時日 諸陵有司以元日冬至寒食

節第二第三日上元節等前後各一日中元節前一日

立春二月二日春社上巳重午初伏七夕秋社中秋望

日重陽下元節臘朔望各一日進獻下宮

陳設 前一日都監常服帥其屬闔寢宮門設神御座

南向

其詣諸陵次第與前篇同

陳供奉之物於座前訖闔寢宮門進

獻日行事首設都監位於庭北向香火內侍位其後焚  
獻者仍設望燎位於門外都監南向香火內侍位其後  
唯永定陵都監先詣真宗皇帝下宮陳設畢帥其屬詣  
章惠皇后陵闔宮殿門升殿行掃除於上降行掃除於下  
訖設神御座於殿上當中南向陳香案及供奉之物於  
座前訖闔宮殿門設行事望燎位同上儀永裕陵下宮

惠恭皇后位陳設並如諸陵下宮之儀

省饌 前進獻一日都監常服閱饌物詣厨省覩視滌

濯晡後帥其屬臨造神饌

若七夕中元節冬至日前一日造饌

行事 進獻日質明

若七夕中元節前一日即未後

都監以下常服帥

其屬闕寢宮門以俟陳設畢奉饌者各陳於外進饌者

序入都監香火內侍入就位再拜升自東階由殿後詣

神御室卷簾褰帷都監詣香案前搢笏三上香執笏少

退再拜

遜位再拜

詣每位神御前搢笏進湯次進酒饌恭奠

於座前執笏侍於側

候進酒饌畢徹酒再酌酒進次味至少移故處並香火內侍供應

俟酌獻畢進表

無即不進

少頃進茶訖徹饌洒熄香火下帷

簾闔牖戶俱降復位再拜以出

焚獻者詣望燎位執燎

闔寢宮門

乃退

若永定陵則都監先詣真宗皇帝下宮行禮畢帥其屬詣章惠皇后陵闔宮殿門以俟降設訖行禮

並如上儀闔宮殿門訖退永祚陵則都監先詣神宗皇帝下宮行禮畢帥其屬詣惠恭皇后位行禮並如上儀

薦新諸陵儀每月陵所遇有新物薦獻下宮

孟春以韭菹茵陳卵

仲春以水鳧茈萐春以筍菹白醑煮酒藕鮓魚如鮓魚闕代以鮓鮓益夏以含桃李麥豚豕仲夏以黍鵠雞瓜杏林禽萐夏以麥茨蓮蓬益秋以黍稷棗梨葡萄仲秋以麻稻醑酒鵠萐秋以白小豆兔栗榴梧益冬以馬

山藥仲冬以麝  
柑橙季冬以魚鮓

陳設 前薦新一日所司具新物詣陵所都監常服帥

其屬闕寢宮門設神御座如儀及陳供奉之物於座前

訖闔宮門薦新日未行事前設都監位於庭北香火內

侍位其後

唯永定陵都監先詣真宗皇帝下宮陳設畢  
帥其屬詣章惠皇后陵闕宮殿門升殿行掃

除於上降行掃除於下訖設神御座於殿上當中南向  
陳香案及供奉之物於座前訖闔宮殿門設行事位如

儀上

省饌 前薦新一日都監常服闕薦物視滌漑進饌者

詣厨省饌以時帥其屬臨造

行事 薦新日質明都監常服帥其屬闕寢宮門以俟

陳設畢奉薦物各陳於外序入都監香火內侍入就位

再拜升自東階由殿後詣神御室卷簾褰帷都監詣香

案前搢笏三上香執笏少退搢笏奉薦物恭置於神御

前訖出笏詣香案前再拜

逐位再拜並香火內侍供應

侍於側如食

頃徹畢洒熄香火下帷簾闔牖戶俱降復位再拜闔寢

宮門訖退

若永定陵則都監先詣真宗皇帝下宮行禮畢帥其屬詣章惠皇后陵闕宮殿門俟陳設

訖行禮並如上儀  
訖闔宮殿門乃退

明會典熙祖曰祖陵

高帝之祖

在泗州設祠祭署置奉祠一

員陵戶二百九十三戶供灑埽每歲冬至正旦以三太  
牢祭熙祖并望祭德祖懿祖二陵清明中元孟冬及每  
月朔望以三太牢本署官行禮

仁祖曰皇陵在鳳陽府設皇陵衛并祠祭署奉祠一員  
祠丞三員置陵戶三千三百四十二戶供直宿灑埽內  
選禮生二十四名供祭祀執事每歲冬至正旦以太牢

清明中元孟冬以少牢俱署官行禮朔望以少牢中都  
留守司官行禮弘治元年勅內官一員監護凡官員以  
公事經過者俱謁陵

太祖孝陵設神宮監孝陵衛及祠祭署每歲聖誕正旦  
孟冬忌辰酒果行香清明中元冬至太牢致祭特遣勲  
舊大臣一員行禮南京各衙門文武官俱陪祭國有大  
事遣大臣祭告親王之國過南京者官負以公事入城  
者俱謁陵出城者詣辭



天壽山諸陵

成祖長陵仁宗獻陵宣宗景陵英宗裕陵  
憲宗茂陵孝宗泰陵武宗康陵世宗永陵

穆宗昭陵神宗德陵光宗  
慶陵熹宗定陵愍帝思陵

各設神宮監并衛及祠祭署

凡清明中元冬至太牢致祭遣官行禮文武衙門堂上

官各一員屬官各一員分詣陪祭忌辰及聖誕正旦孟

冬亦遣官行禮止用香燭酒果無帛各衙門官不陪祭

諸王之國詣諸陵謁辭

景帝陵在金山祭遣儀賓行禮後遣駙馬及皇親行禮

睿宗顯陵在承天府設神宮監顯陵衛祠祭署置奉祠

一員以戚屬為之給署印設禮生二十四名供祭祀執事陵戶六十戶供灑埽校尉二十名供巡視嘉靖十八年陞戚屬為都督僉事給欽差純德山掌祀關防職專守護始於太常寺選補奉祠及增祠丞一員如七陵之制二十七年照長陵制設左司樂一員右司樂三員俳優四名色長十四名教師十六名供祀鑄給顯陵供祀教坊司印信每歲清明霜降二聖忌辰遣鎮守湖廣勲臣行禮勲臣有故以守護奉祠官代行奉祠官有故則

分守官代聖誕正旦中元孟冬冬至遣守護奉祠官行禮

山陵躬祭儀 一發京先期太常寺備告廟及祀陵祭品如常儀翰林院撰祭告文錦衣衛設丹陛儀衛扈行兵部奏請簡命文武大臣居守京師請勅行事及奏請直守皇城四門京城九門分調提督武臣把守各山口關隘選點扈駕軍馬奏差科道官點閘戶部關給扈從官軍行糧工部差官修理橋梁道路光祿寺預備御膳

酒飯供具教坊司備大樂五府及九卿衙門正官司屬  
官各一員太常寺鴻臚寺堂屬官光祿寺太僕寺卿翰  
林院學士并日講官國子監祭酒順天府府尹六科官  
六員十三道官十三員俱從凡在途供事以便衣朝參  
以吉服前期一日上率后妃告於廟至早免朝駕發由  
長安左門后妃輦轎由東安門出扈從官前行居守官  
同文武百官俱吉服趨德勝門外候送駕過退駕至行  
宮在今華城進膳畢陞座從官朝見行叩頭禮如常儀次

日早從官朝參奏事畢鴻臚寺官引昌平州官吏師生  
及公差有事官負見行五拜三叩頭禮朝罷從官先行  
至天壽山行宮候駕駕發后妃後從至天壽山紅門上  
降輦由左門入駕至行宮今名感思殿進膳畢上出陞座從  
官行叩頭禮畢退次日早從官朝參奏事如常儀 一

致祭是日免朝質明上具青袍恭詣長陵致祭如常儀

隆慶二年仍詣永陵行禮萬厯  
八年仍詣永陵昭陵各行禮

遣官六負青服各詣陵

行禮從官俱青布服恭詣長陵陪祀祭畢先趨赴行宮

候駕每日早朝參奏事如常儀 一回鑾是日早免朝

從官先行至沙河行宮候駕駕至從官行叩頭禮如常

儀次日早從官朝參奏事畢鴻臚寺官引昌平州官吏

師生辭行禮如常儀朝罷從官先還駕由德勝門入文

武百官及軍民耆老人等俱於門外候迎居守文武大

臣伏謁駕前致辭行叩頭禮教坊司大樂鼓吹振作駕

入告廟謁皇太后禮畢

隆慶二年發京前一日及還京日並謁告奉先殿世宗几筵弘

孝神霄二殿

還宮越二日上御奉天門文武官各具吉服致

辭行禮

山陵遣祭儀

陳設用牲醴贊引引遣官由殿右門入

典儀唱執事官各司其事贊引引遣官就拜位執事捧

香合至香案贊引贊詣前導遣官至香案前贊跪贊上

香遣官三上香訖贊復位贊四拜

通贊衆官同

典儀唱奠帛

行初獻禮執事捧帛爵各跪獻于御案前訖贊跪

通贊衆官

皆贊讀祝讀訖贊俯伏興平身

通贊衆官同

典儀唱行亞獻

禮

禮同初獻惟不奠帛讀祝

唱行終獻禮

儀同亞獻

贊四拜

通贊衆官同

典儀

唱讀祝官捧祝進帛官捧帛詣座位贊禮畢

各陵祝文

清明霜降曰時維

仲春雨露既濡  
季秋霜露既降

追念深

恩不勝

怵惕  
愴

謹用祭告伏惟尚享

中元冬至曰氣序

流邁時維

中元  
冬至

追念深恩伏增哀感謹用祭告伏惟尚

享凡祝文皆備書謚號其文皆同但隨陵異稱 凡遇

陵祭正統元年諭是日與百官俱淺淡服色

丘濬大學衍義補臣案禮經無墓祭之文後世行之  
雖非古也然祖宗體魄所藏留骨所在為子若孫者



漠然以土隴視之越歲踰時不一展省焉其情安乎  
情之所不安義之所不當此禮所以貴乎義起也上  
陵之禮三代以前雖不經見然自漢以後歷代相承  
率不敢廢非不敢也蓋不忍也在漢初天子雖不躬  
行然奉常屬官有寢園令長丞又有園郎寢郎園中  
各有寢便殿日祭於寢時祭于便殿寢日四上食丞  
相以四時行園光武自建武六年至二十二年凡三  
幸長安皆有事于上陵則固躬詣陵行禮也但未立

定制耳唐開元禮有天子上陵儀注又歲有清明設祭朔望時節之祀宋又行於春秋歲以為常我朝上陵之禮凡三舉焉清明也中元也冬至也每遇行禮文武諸司各遣官一員而以親王或駙馬都尉主祀事天下無事天子於清明日亦時或一行其忌日則惟遣駙馬而百官不與焉其或藩王有來朝者亦許拜謁孝陵在南京內外臣僚有事經過者必先拜謁否則有罪臣竊以為人子於其親當一於禮而不可

苟於其生也則既事之以禮矣迨其死也其體魄歸  
之於地者為宅兆以藏之其魂氣之在乎天者為廟  
祔以棲之其洋洋乎在廟祔者則固神事之其累累  
然在丘隴者安忍以死事之哉但為之制不可盡備  
宜視歲享而殺一事以神道而兼用吉凶之禮庶乎  
得古人起禮之意云

讀禮通考卷九十四